

東
華
續
錄

東華續錄

光緒一百十

臣朱壽朋敬編

臣張毓英恭校

五月戊午朔諭光裕等奏庫存祭器被竊將值班兵役審辦並自請嚴懲一摺○查禮部祭器該管官員自當認真典守豈容稍有疏失此次 純惠皇貴妃園寢祭器竟至失去一百六件之多該官兵等所司何事殊堪詫異現經光裕等將值班兵役等交遵化州嚴行審訊卽著順天府五城御史直隸總督各飭所屬一體勒限嚴緝務將賊犯拿獲懲辦總管翼長及值班官兵人役並著光裕等查明參辦光裕等應即嚴未克先事預防亦難辭咎均著先行交各該衙門議處遵化州知州陳以培薊州知州趙文粹經光裕等牌調審案均託故不到著一併交部議處○己未 上幸北海震勦齋閱侍衛射○以廣西肅匪剿平予出力人員朱賀等獎敘有差○甲子以礮士成爲山西太原鎮總兵○以廣東東陽江匪平予出力人員顏金等獎敘有差○乙丑 上幸頤和園詣 慈福端佑康頤昭豫莊誠壽恭欽獻皇太后前請安○迴海○以慶連爲雲南普洱鎮總兵○劉秉璋奏光緒十八年三月十六日准軍機大臣字寄二月二十七日奉 上諭有人奏銷售硝磺斤數增多利小害大一摺據稱貴州委員赴川滇等處設局銷售硝磺

川省州縣發給印票一人一票准購百斤恐奸民販運貽害地方請飭仍照舊章辦理硝磺每票准購百斤有無流弊著劉秉璋王文韶譚鈞培體察情形奏明辦理原摺著鈔給閱看將此各諭令知之欽此遵旨寄信前來伏查光緒十二年六月准戶部咨貴州撫臣潘蔚奏採辦銅鉛煤鐵硝磺各礦章程一摺奉旨准其開辦運往各省售賣等因臣以硝磺例禁禁嚴咨黔請其停止硝磺入川旋准黔省咨覆薰磺係民間薰物之用未便併禁由前升司等議准薰磺一物運赴彭山縣城報官設店銷售商人購磺須由地方官查明出結印票若無印票者不准私相買賣近因黔省志在多銷薰磺利源臣與司道籌議其不得已通融辦理每商祇准一票每票不得過百斤乃近年頗有私磺入川如樂山縣彭山縣貴州等處迭經查獲磺斤每起一二千斤三四千斤不等該委員輒藉官磺為詞出頭扛護臣與黔撫反覆商論從寬免罰原冀寬既往以儆將來刁員奸商恃官磺局為護符運川動輒鉅萬月前瀘州知州李玉宣查獲私磺三萬二千餘斤稟報前來以一票百斤計之已合三百票為一票矣實難保無濟匪情事當經批飭充公究辦在案查黔員運磺豈必徑售於匪徒然所販之商輒轉分售勢不至濟匪不止黔員藉口薰磺為川民所必需如果屬實則川省商人自可領票赴黔購買何勞黔員運送來川黔省松楸一局界連承川擬請嗣後黔磺只准囤積於黔省適中之地川商如有採買薰磺者由官給與印票註明十斤之限隨

赴黔局採買其彭山一局深入腹地五方雜處稽察難周應卽撤局以昭慎重伏思硫磺礮礮本無區別皆可以資火器川省人心浮動伏莽堪虞去年萬縣窺英河之謀逆茂州何三木匠之聚衆謀叛皆用火器緣人幸皆登時殄滅此後流弊防不勝防川省歲協餉餉數十萬黔省所收之礮利計亦甚微黔礮害川亦非黔省之利茲奉前因若不趁此規復舊流毒伊於何底臣於此次奉 旨後卽檄兩司通飭各屬恪守舊例仍以十斤爲限再查照通融現章每票亦止百斤此次一票至三萬餘斤之多如係官礮應請 旨飭下貴州撫臣查取官礮局委員銜名照私售礮礮例嚴加議處如係私礮除礮斤充公外卽由川省將該私販照例治罪得 旨如所請行○庚午 上詣 大高殿祈雨○辛未賜劉福姚等三百七人進士及第出身有差○乙亥 上幸頤和園詣 慈福端佑康頤昭豫莊誠壽恭欽獻皇太后前請安○還海○丁丑諭都察院奏已革總管椿齡遣抱呈訴被參冤抑並有牽涉馬蘭鎮總兵各節奏明請旨一摺案關 陵寢重地瀾官許告大員亟應澈底根究著派貴州周德潤馳驛前往 東陵秉公查辦據實具奏隨帶司員著一併馳驛抱呈方生該部照例解往備質○戊寅 上詣 大高殿祈雨○己卯閩浙總督卞寶第因病奏請開缺允之○壬午以松淮署刑部尙書○許振祿奏臣前於十六年八月奏定黃河兩岸歲修額數以四十八萬兩概歸七屬赴司支領辦工而另提十二萬兩設立河防局委員監

辦據實開單報銷仰蒙 恩准欽遵試辦在案行之一年大致就緒而河流仍在中洪此皆仰託 聖主
洪福百靈效順 聖主在工員弁幸免愆尤無任感戴緣 臣改辦初意實以四十八萬兩爲保常以十二
萬兩爲防變論各屬員承辦常工係限四十八萬似形竭蹶非提出此十二萬兩實不足爲防變之資 臣
知河防關係鄭重而 國家帑項亦甚艱難故應極爲愛惜撙節使其涓滴到工以爲先事培補今自改
辦以來各道屬幸皆能仰體 皇上兢兢守法料垛多積而斤兩加增埽段多鑲而工用歸實已將前弊
悉除至河防局則遵照定章不令一錢入門領款即運送工次或交委員卽帶銀上山買石所以另設監
工局者不過免其河干露宿有屋棲止得以朝夕相親河流商籌拋石加埽而已至動用夫土銀錢令其
將價值實用細數隨時揭示張貼庶人言可畏不如是則難保無遺言生事之人亦難保無失算浪費之
事有此上下交核弊何從生 臣維從古治河 無良策若使定一規條可以一勞永逸不復有危險之驚
及年年節省不至撥鉅款之用則自 聖朝垂統二百數十年以來未曾及此而謂 臣之所陋荒弛敢以
是欺飾於 君父乎當改革時約有二說其一因裁革浮習太多眾怨所叢設詞誣毀以爲專擅自用必
至潰裂此爲妄圖報復不足計較其一謂河工險變無定何得遽定額款敢任責成恐爲幽莽之大言未
有可憑之實據此爲關切時局尙非泛言然 臣實感激 聖主恩隆愚圖報於萬一若謂以專擅而甘

履危險不顧大局臣雖至愚亦不出此至謂實心實力實工實用亦遂擲付東流於河務毫無所益者臣亦未敢信也臣總以恪遵 聖訓先事預防為務故不得不愛惜此十二萬兩以為補偏救弊之用請為我 皇上縷晰言之夫河流遷徙無定無定則南岸告警北岸必鬆世之北岸亦然又推之大江支河亦然凡南岸傾塌則北岸必生沙洲未有能使兩岸無事者此從古如斯也去歲河歸中流臣飭工員加拋築灘大礮力與水爭用能挑溜遠去遂歸中流然究竟不放過挑若過挑則北岸又生大險矣又南北兩岸尚多有將來可畏而必生之險此時不敢動工者蓋平時淺水鑲埝築壩一經大溜頃刻即行漂散必待大溜衝散庶可將石料相爭壅壓到底故雖有石料亦不能先期動工也又若大溜正衝而始報險請款買石購料則往返非月餘不辦其水之溜深已不下十數丈矣搖挂其難耗費數倍故不得不於平時而籌存石料也凡河防局監工局之設固皆以為此也款不入局則無可侵蝕之地石論斤兩則無可為侵蝕之物臣之所以甘任責成上對 聖明者在此定計每年有險則用此保工有餘則概以買石墊抽之見亦能如此而已今據河防局呈據承辦監工委員等造具報銷冊詳請奏咨前來查上南河屬屬鄭州中汛修築楊橋順河長埝土工二段共長四百八十三丈共用銀四千九百九十七兩三錢七分六釐鄭州下汛十七堡下首鎮做護埝八段共長八十一丈共用料物夫工銀二萬六千九百六十四兩七錢

二分學潭大壩九堡並十一堡拋護石垛二道共長十四丈一尺共用石三千九百九十三方七分共用石方銀二萬七千九百三十九兩九錢二分五釐以上上南河屬歲修土埽石共三案統共用銀五萬九千九百二兩二分一釐撥加查核俱係實工實用亦與原報數目相符又臣於霜降安瀾摺內會奏請上南中河下南下北祥河五屬各有應行添設壩垛估計需採購山石一萬方交候補道劉黃履中承辦當時衛糧報工之票未到而石方運送遠近之費亦未核定是以僅撥銀五萬數千兩比飭先行購石以免冬乾水涸運送維艱旋奉諭旨著分飭該道屬等認真防護並令派出之員將上南屬應行採購石方添築壩垛工程限年內一律辦竣毋稍疏懈等因轉行欽遵在案茲據採購石方委員黃履中稟報迅即赴山開採陸續起運計運到上南中河下河衛糧祥河下北六屬共堆成碎石九千九百三十餘萬方均點交監工委員並各該廳驗收所有不敷銀兩即於在四十八萬內提出二萬兩以清石價訖經監工委員在兩岸各工緊要處所相度機宜分別逐工暨拋據各該廳查明造具印冊稟送前來查上南屬屬鄭州上汛頭堡桃園將軍廟通上拋護石壩一道共長九丈共用石三千五百十三方二分共銀二萬四千八百五十八兩一錢七分七釐中河屬中牟下汛五堡拋護石壩一道共長八丈二尺共用石二千七百八十八方共銀二萬二千一十四兩四分八釐下南屬祥符上汛二十二堡撥二壩通上拋護石壩

一道共長六丈四尺六寸共用石一千四十三方二分九釐共銀八千八百六十三兩七錢九分二釐衛糧廳陽武汛十七堡同石壩尾土壩頭拋護石垛一段共長五尺共用石二百九十七方共銀二千二百一十四錢六分二釐祥河廳祥符上汛十五堡魚鱗壩通下空檔拋築石壩一道共長七丈六尺共用石一千二百十六方共銀一萬一千四百二十五兩五錢三分六釐下北廳祥符下汛二堡通下順堤拋護石壩一道共長五丈一尺共用石九百九十四方五分共銀九千九百四十一兩二分二釐以上六廳拋辦碎石工段共六案計山價歸濟源寧縣兩地分採不同其運送各廳遠近船費不同至冬杪水涸另換撈船亦頗加費共用石方銀七萬九千三百一十四兩四分七釐覆加查核俱係實工實用均與原報銀數相符下工部知之○許振禱奏臣於三月十二日准工部咨具奏東河修防事宜請防流弊一摺並鈔錄原奏恭錄 諭旨等因咨行到臣伏查原奏內稱今年實餘六萬兩來年即可少撥六萬兩不得以歲請額款爲定數此誠慎重帑項之至意也但部臣主於惜費亦必不忘防險微臣則主於防險其實兼寓惜費臣改章一摺請歲額六十萬兩爲數本不寬餘並聲明尋常小險不另請款以臣之愚所以敢任此艱鉅者總以整躬率屬實心實力實用實銷使先事預防四時有不斷之工作以收曲突徙薪之效去歲試辦之初仰賴 聖主洪福河流順軌爲邇年所僅見故臣得以節省款項僅數購石加拋河工積疲

已久臂之元氣虛弱之人非漸次培修難冀捍禦銀帛爲一時之計石工爲不朽之基用一錢必有一錢之益而其費先雖較帛工爲特多後實較帛工爲特省惟兩岸應辦之工實屬不少若欲同時並舉不但臣不敢請此鉅款且有必待河溜過射方可拋石築壩者故非一時所能辦成亦非一時所能盡省也惟冀事機順手逐年節省逐年擴充將來石壩愈多銀帛自少增卑培薄永固金堤此卽臣培養元氣之說也亦卽臣節省經費之策也河流善變自古已然設遇三汛盛漲迭出險工則河防局十二萬兩竭力支持已屬不易若復核減額款臣又安能赤手空拳爲未雨綢繆之計乎設以工款拮据致生意外之虞臣之獲咎固不足惜其如下游數百萬之生靈何此額款萬不可核減之實在情形也原奏又稱河工尙有分賠之例應將河防局辦工委員銜名隨時咨部此亦綜核名實之至計也臣竊以銜名之報與否與分賠之例殊不相妨臣所轄放運兩河文武屬汛升遷調補向無隨時咨報工部之事河防局及監工委員事同一例臣嘗委札昭然設使咨干分賠一經查取職名斷不能倖逃法網此又銜名之無庸隨時咨部乞部臣稍爲寬假以歸簡易者也總之部臣之意重在守法故於法密之又密而惟恐其疎臣之意重在任人故於工慎之又慎而必求其穩與其牽義拘文貽誤於事後不若竭誠據實盡陳於事前臣於部臣慎工惜費之意大概相同雖目前有變通而其相與維持防河大局則一也得旨如所請行○李鴻章

北洋海防用款前經總理各國事務衙門會同戶部奏明由督辦大臣咨報總理衙門戶部查核嗣於光緒九年八月部議應三部分銷歷經照辦理已造報至三十四年止內有兵部駁查各款業經另文登覆餘均奉部准銷自十五年正月起北洋海軍經費經臣奏明遵照新章收支另作起訖以清界限應即按年造報飭據海防支應局司道詳稱前已將新定又款照章造冊詳咨立案並聲明舊有支款無庸再行立案今自十五年開辦新章起作為北洋海軍報銷第一案計開管項下截存銀七萬九千七百二十一兩零新收各省關解到稅釐銀九十六萬五千一百一十兩零又各處解還領用軍火價銀九百三十八兩零准軍餉項協撥行營製造局造子薪工及電報學堂經費銀二萬二千四百七十二兩零北洋電報官局收繳商報信費銀九千五百六十八兩零扣收京平平餘銀三萬一千八百一十兩零北洋設立電報經費餘款銀三十九兩零共新收銀一百二萬九千九百三十九兩零連舊管合銀一百一十萬九千六百六十一兩零內除扣存平餘銀三萬一千八百一十兩零係應解海軍衙門之款即在十大年分應領鎮遠等七船俸餉內劃抵列收造報外實計收用銀一百七萬七千八百五十兩零開除項下應歸戶部核銷各款內水雷魚雷等營共支五萬二千九百四十八兩零學堂船塢等處員弁人等共支銀十七萬六千一百二十五兩零學堂船塢等處僱用教習洋員共支銀四萬八百五十七兩零出洋學生及雜支

等項共支銀九千二百三十三兩零准餉協撥造子薪工等項共支銀二萬二千一百五十四兩零應歸兵部核銷各款內海軍俸餉共支銀二十五萬一千七百五十二兩零內河各輪艇共支銀三萬七千八百三十四兩零各兵輪僱用教習洋員共支銀五萬八千一百三十三兩零恤賞運保等項共支銀三千五百七十四兩零應歸工部核銷各款內採買共支銀十四萬五千八百九十九兩零工程共支銀四萬九千五百九十七兩零修理共支銀四萬九千三百二十八兩零製造共支銀十萬六百七十三兩零以上統共支銀九十九萬七千一百八十三兩零其餘銀八萬六百六十七兩零已接支十六年以後用項無存備案造具三部分銷細冊收支四柱總冊開除款目清單詳請奏咨核銷前來臣查十五年分北洋海軍經費係由海軍衙門接常年額支之款核定指撥以供計授要需遇有必須添購要件添建要工不在歲撥數內者前已奏明由工部雜費項下截長補短竭力勻籌此後海軍應辦各事需費正繁如有額外用款實難騰挪再行查照奏定海軍章程隨時咨商海軍衙門妥籌核辦值此時艱餉絀非特新增用項必加詳審卽舊有支款無不督同在事各員隨時考察可省卽省至訂購外洋軍械器具其價目多寡尤必諮訪比核務求撙節不使稍涉虛糜惟海防參用西法一切支款並無例案可循亦非他項軍需可比擬於立案摺內將應辦各項實在情形詳細聲敘茲再逐款覆核委係實用實銷並無絲毫浮費下所司知之○甲

申夏至大祀 地於 方澤 上親詣行禮○以施寶成爲涼州都統○乙酉以譚鍾麟爲閩浙總督○予故總兵章合才照軍營積勞病故例議卹職續交國史館立傳○諭軍機大臣等有人奏熱河平泉等四州縣去歲被匪蹂躪商民彫敝該處向派差費及發商生惠銀兩請分別裁撤寬免等語著奎斌體察情形酌量辦理原摺著鈔給閱看將此諭令知之○丙戌剛毅奏蘇省農田全資水利臣前年履任後察核溧海各口河道因潮汐往來大都淤塞當將吳淞白茆蘆漢等河次第籌款興挑在案旋查得常熟昭文二縣境內之福山港河道爲該二縣民生利賴所關徐六涇一河爲長洲元和常熟昭文無錫金匱江陰七縣灌溉要區向先借款開挑隨後分年按田攤徵歸款又該二縣境內之高浦耿涇海洋塘西洋港等四河歷係民捐民辦現因福山港等六河年久失濬漸就湮塞亟宜一律疏鑿深通以資蓄洩卽經飭司派委熟悉水利工程之候補知府周運前往會督官紳確切勘估各該河道共計工長一萬六千餘丈連築壩屏水局用經費等項約共需錢合銀三萬八千六百餘兩惟工長費鉅一時無可指墊復督同籌議於蘇州藩庫收存賑餘項下如數借撥俾濟工需所有福山港徐六涇兩河照章由得沾水利各縣於忙漕內分年帶徵歸款其高浦等四河據該二縣官紳請於城鄉糴米石每石各捐錢四文彙集解還司庫詳經臣批准照辦一面飭令趕緊集夫開挑去後旋據稟報於本年正月初十日築壩興工分派

員按段監挑中間連遭陰雨節節停止賴該委員等任事踴躍於三月二十三日全工告竣臣親詣河干逐段測量勘驗所挑工程均屬如式寬深已飭啟放放水舟楫暢行無阻農商歡忻用過工費均尙撙節核與原估並無浮冒下部知之

六月丁亥朔升泰奏奴才於本年二月十八日會將到邊日期及赫政函覆必須商上允行始能訂期各緣山具奏在案旋即迭飭商上迅速稟覆因藏中時值擴招於二月二十日始據第穆呼圖克圖轉遞三大寺及僧俗大衆嗣經公稟內稱第二條在亞東地方買賣地基修建房屋不能遵依仍照原議由商上在於關外修建房屋與英國商民居住按日收租不得短少第三條通商五年出進貨物概不納稅請由商上收稅不肯延宕五年之久第四條應禁各物如甲喇喇地方向無鹽茶進藏之規請仍照舊至軍伙器械迷醉藥等項並請嚴禁出入又續款第二條日後兩國均以亞東設關爲無益或改移藏內他處或另設口數口所有章程俱照前開通商各條辦理無論如何皆不遵依亞東設關不得不勉遵大皇帝諭旨決無復在藏內他處改關及添設商口之事等情當經奴才逐條酌核查第二條商上凡爲所屬向無買賣土地之事漢民亦係租賃房屋居住但應查照前議於亞東關外由商上自建寬大堅固潔淨房屋與英商居住第三條課稅爲朝廷維正之供從無關部自收之理商上既遵大皇帝教

化卽不應違悖法度妄思自行收稅至應否五年後收稅均應請示總理衙門核辦第三條藏中應禁各物未能深悉應由赫政詢問駐藏番員邊覺等官辦理其鹽茶貨物凡涉商務可否照禁亦應俟立約後請示總理衙門核辦至續款第二條數年後有無利益斟酌變易例屬通行且約內言明如兩國皆以爲無益始行改設另添毋庸執拘當經譯飭商上遵辦並函覆赫政去後旋據第穆轉遞三大寺及僧俗大衆圖記公稟於各條又復遵依惟於續款第二條五年後改關添口之事反覆議論意謂亞東設關原屬勉強本爲無益何待五年再行改設添口之事前約未言改關英人去歲尙有立意改設帕克哩江孜之事此次立約既言改關將來勢在必行大眾處心無論如何暫不遵依復經奴才迭飭委員裕綱等竭力開導繼以五年後兩國均以爲無益始行改關其權仍在爾商上爲辭詎意立意甚堅毫無轉移才窺探其意蓋因去歲英人注意改關兩次遞來條款虛聲恫喝揆之誠爲過盛此番雖復前議定地亞東而約內牽涉改關復加添口藏番疾首痛心有若驚弓之鳥其錮蔽誠有非言語所能盡釋者只得據擬赫政轉遞保爾請將續款第二條內刪去改關添口之事以免礙難伏查總理各國事務衙門前致奴才密啟示以英俄交構機宜於英使前來開一節略告知赫政曲陳保爾俾知覺悟便可就緒不意到邊英人復肆發展必欲藏番款款遵行始能訂期前來出關反爾有挾而求奴才惟有虛與委蛇靜以伺之免致

另生枝節但該衙門王大臣函示機宜實此案一大樞紐未便因其遲遲秘而不宣恐滋貽誤當即節錄原函密達赫政令其設法先陳保爾婉致印督去後旋准赫政兩次來函未經提及奴才固已知此函之深中要害而彼族之躊躇瞻顧豈有不可名言者矣遲至本月十六日始據赫政函復前寄總署密取及此次各條藏番邊依惟續款第二條不能遵辦各節不但面陳保爾且另備公文知照聞保爾已將去文轉呈印度國家一俟札覆保爾即當函覆看此情形英人雖未必願意而時事所迫或可冀其變通奴才自當審度機宜可了則了不敢以功屈垂成率意將事一俟印度覆議如何再行具奏得 旨該衙門知道○李鴻章奏准恭辦 醇賢親王事宜大臣福銀等咨稱奏准圖釋外圍地方添設綠營官二員汛兵六十名分駐防守請 旨飭交直隸總督派撥其應建衙署營房併令奏明辦理等因鈔單知會前來臣遵飭即咨行直隸提督在昌平參將所管營汛內就近撥派弁兵應建衙署營房亦即遴員先往相度地勢繪圖貼說估計工料詳晰報核旋准提 臣葉志超咨稱飭據昌平營參將楊兆雲據派把總外委各一員挑撥營兵六十名即日領帶帳房前赴圖釋外圍地方駐守該署參將親往相度建置地基邀集承修官工商人估計價值據稱地居山坡四圍全石取水運土購料築地種種耗費約需銀四萬五六千兩請另派員覆勘等語臣即遵派候補知府格洪額及熟悉建造房屋工程之候補州判周士培前往會同

該署參將核實確估該委員等稟商福錫指撥內務府掌儀司當差果園承種山坡官地一段計二十五畝堪以建造該處亂石巉巖高據半山之上無水無土工作極難須在旁挖塘汲水就山下取土運工所有磚瓦石灰等料均購自十里以外木料須由天津購運價昂統計通工購地買土平壘修牆挖塘築基等項需費浩繁共建房屋大小一百三十八間並於山上另建更房期與旗營聲勢聯絡估需庫平實銀二萬五千八百四十六兩另較原估少銀二萬有奇據該委員等將間段丈尺做法繪具圖說稟覆前來臣詳加考核所擬辦法尙屬節省竅實飭由保定練銅局照數籌撥尅日興工此項工程修在山坡險要之間伏秋山水勢若建瓴非格外堅實斷難經久而下坡運土半山挖塘運道購料比尋常工程倍爲艱鉅不能以例價相繩現估銀數較之商人原估所省幾至一半實屬力求撙節無可再減工竣後應請由外核銷免其造冊報部工程未竣以前各官兵等仍令支搭帳篷分班晝夜駐守不准暫離以昭慎重官兵移撥之初不無耗費原領銀米不敷養贍自宜略加口分以示體恤擬援照同治十三年奉派巡邏 將祥峪 定東陵並看守物料官兵加給津貼成案每名日給銀八分計官共六十二員名每年共需銀一千七百八十五兩零應由司庫照章以大成實銀動撥按季發交霸昌道隨餉領回就近散給得旨 如所請行○戊子轉徐部爲吏部左侍郎調徐用儀爲吏部右侍郎以張蔭桓爲戶部右侍郎○

庚寅 上詣 大高殿 時應宮 宣仁廟祈雨○乙未 上詣 奉先殿 壽皇殿行禮○丙申以京

師得雨 上詣 大高殿 時應宮報謝○丁酉命翰林院編修汪鳳藻充出使日本國欽差大臣○己

亥諭福潤奏特參徵收錢漕弊弊營私之知縣請革職拿問一摺山東調署惠民縣知縣本任陽信縣知

縣焦維霖在陽信縣任內經徵錢漕與解支數目不符難保無侵吞情事焦維霖著卽革職拿問交福潤

提同經管書吏人等督同研訊按律懲辦○諭前據都察院奏已革總管椿齡違抱呈訴被參冤抑並有

牽涉馬蘭鎮總兵各節當經諭令黃恆周德潤馳驛前往 東陵查辦茲據查明覆奏此案有無冤抑應

以所分界限是否管理樹株爲斷現據黃恆等查明儀行樹株爲內務府兼管紅梅內外海樹爲綠營專

管八旗官兵值班上夜自道光十二年奏定畫界章程應北由羅圈牆南至神廟庫爲巡邏界限並不管

理樹株道光十九年東西馬牌北砂山儀樹被竊統將八旗內務府開參實係錯誤此次西下下牌北砂

山地段既非八旗專管又非巡邏所及自應予以處分已革 孝陵總管椿齡值班防禦文錄玉林原參

革職處分均著准其開復椿齡所控英廉各節據黃恆等分晰查明皆屬牽涉所及暨之椿齡則樞事屬

誤會或稱得自傳聞卽著毋庸置議英廉辦理此案並未查明定章輒照道光十九年成案辦理實屬疏

忽英廉著交部察議餘著照所議辦理 陵寢樹株關係緊要經管各員自應認真看守著光裕懃督英

廉嚴飭內務府緣營於應管儀樹海樹查照例章畫清界限各專責成毋得稍有疏虞致相推諉○壬寅總理各國事務衙門奏請專派薛福成商辦滇緬界綫商務以重事權允之○癸卯諭軍機大臣等有人奏大員劣跡昭著列款糾參請旨飭查一摺據稱升任山西巡撫前安徽布政使阿克達春不通文理專倚幕友翟介臣此人鄒姓爲左右手以致把持招搖遇有派差委缺必經彼二人議定價值始行札飭知府李成繁知縣吳本仁均以賄賂而得補署又有收拜門生令屬吏按時餽送等情皖省支應局有存儲銀十數萬兩阿克達春到藩司任後巧立公費名目隨時提取甚至僕婦家丁均按月向局開支虧項甚鉅等語所奏是否屬實著劉坤一確切查明據實具奏毋稍徇隱原摺著鈔給閱看將此諭令知之○內閣學士錢桂森因病奏請開缺允之○中辰諭本日護理浙江巡撫劉樹堂於陳奏尋常事件輒用四百里馳遞殊屬不合著傳旨申飭○丙午福潤奏小清河爲東省各屬民田水利所關河身年久淤塞閘閘迭受災祲上年前撫張曜籌議疏通因工長款絀無力一氣興辦先由下游博興縣之金家橋起至壽光縣海口止計長一百十餘里集夫挑浚將南紳勸集賑捐之款作爲挖河之需其金家橋壩上工程擬俟下年集款再行次第辦理當將詳細情形於上年五月奏奉 硃批著照所請該部知道欽此欽遵撥飭登萊青道盛宣懷督同南紳嚴作霖招集附近災黎以工代賑分段挑挖工竣驗收均係寬濶如式

秋大雨時行山泉各水同時泛漲上游未挑河身不免散漫之患自金家橋以下水勢歸槽暢行入海博興樂安壽光等縣秋禾均獲豐收實爲多年所未有核計所費以工代賑之款僅十九萬八千餘兩而官免賑蠲之費民獲收成之益成效已有可觀奴才前與盛宣懷往返函商上游未竟之工應照原奏接續興挑庶使歷城章邱齊東鄒平長山新城高苑博興等縣所受各水悉以導之入海不令漫溢民田則所全者更鉅旋據盛宣懷遴委員紳捐助金家橋以上支脈溝曲折淤淺上游來源不絕竟無築壩壘水之法僅能展寬而不能挖深如果遷就辦理借支脈上截爲小清正河勢難得力查古之小清河自歷城章邱起卽承濟水潞水直注海口爲一大幹河康熙年間上截乾涸卽從軍張開起導洩濟山濠以潞水爲來源乾隆年間高苑境內有乾涸四十餘里船隻難行遂引潞水由濰江河灌注大清河以運食鹽而小清淤矣及大河堵築南堤山泉平漫河已無槽而小清更淤矣光緒八年前撫臣陳士杰自歷城之黃臺橋開濬上新河引水注支脈溝惜籌費太少又值黃河潰口浸膏輒止而小清河忽斷忽續愈淤愈短目前河頭在博興城南灣頭起至樂安滄頭間止其狹如綫其曲如鉤幹弱枝強陳跡湮廢前人嘗略幹而冒枝者大抵因小清舊址漸爲民田侵占村莊鱗比河身高於平陸若欲泥守陳跡實屬無從下手盛宣懷與南紳在該處放賑查河五歷寒暑始敢議請規復小清河正軌而不拘牽小清河故道去年已由海

口向西濬至金家橋今擬由金家橋向西取直就支脈預備兩河套內擇其窪區接開正河歷博高新長
鄉五縣至齊東縣之曹家坡止計長九十七里半一萬七千六百二十四丈河面馬道仍寬三十丈開深
八九尺至一丈三四尺不等兩岸出土成堤約計土方一百三十四萬餘方惟地勢崎嶇窪下中多流沙
泉眼並無齒河空土可除工作較難每土一方通扯須京錢五百文又在金家橋通下起循預備河舊址
開濬支河二十四里至柳橋為止以承濟麻大湖上游各河之水引入新河計長四千二百餘丈開寬六
丈深七尺至九尺不等南岸出土成堤除齒河空土外約計土方十三萬九千餘方每方通扯京錢四百
五十文以上共需工價銀二十四萬四千九百餘兩又河身佔用民地及壓壞麥苗分別給價撫恤約需
銀一萬數千兩當此庫儲支絀無從籌撥鉅款仍由南紳嚴作霖等集捐辦理需用人夫悉係附近貧民
以工代賑使捐賑之款涓滴仍歸災黎以期款不虛糜工歸實在據盛宣懷具稟前來才詳加查核所
擬辦法均屬因地制宜極為妥善已飭該道督同南紳一面勸捐一面興辦並派分省補用知府徐金綬
赴工照料其收支一切均由嚴作霖經理概不假手吏胥所有捐項卽照上年成案歸山東賑捐案內照
章給獎仍彙入賑款收支項下另行開單奏報河堤馬道占用民田若干工竣飭地方官查明畝數造冊
報部再歷城章邱齊東三縣連年受山泉泛溢之災亦復深重現在上新河浚寬無堤而橫江河以上至

歷城之黃臺橋河身更形淤墊前據臣張曜原擬濟南府所屬由省城籌款辦理曾經委員勘估因司局無款可籌遂復中止奴才擬飭盛宣懷無分畛域再與南紳嚴作霖等熟商估計工款仍行勸捐接續挑辦庶使歷章齊三縣河道一律深通上游千山萬壑之水均有去路不致令居民有向隅之憾得旨如所請行○丁未 上諭 大高殿祈雨○戊申長江水師提督李成謀因病奏請開缺允之○予故總兵沈玉遂照軍營積勞病故例議卹戰績交國史館立傳附祀陝甘左宗棠專祠○己酉以黃翼升爲長江水師提督○庚戌劉秉璋奏川北所屬廣元昭化巴州南江各州縣處處與陝省毗連去年漢中一帶秋收稍欠每有饑民入川求乞均經交界州縣隨時查道回籍本年四月初間小麥未收有匪徒陳坤山苟管事周豐刀張占樺等勾結匪類誘串饑民藉求乞爲名佔食大戶乘機竊竊各該地方官因係饑民僅飭團保防範四月十九日該匪陳坤山等約聚百餘人帶有鎗械突至南江縣所屬之禹門場該兩江汛把總陳仲溶帶同兵丁前往攔截該匪等輒敢放鎗將陳仲溶擊斃並轟斃目兵李壽山一名各兵帶傷者九名據南江縣並巴州知元陸續稟報前來臣卽批飭各屬營縣督同兵團嚴行防範一面檄派營字後營管帶孫紹發帶隊由南路進長勝右營管帶姚振榜帶隊由西路進以期兜捕撲滅乃該匪等又擾及東鄉復經臣電飭駐劄萬縣之管帶劉玉田就近帶勇馳赴東鄉與該縣會合協同兵團圍拿又檄營

務處候選道徐春榮督隊前往順慶一帶駐紮調度以一號令並咨明陝西撫臣會拿免致竄越近據巴州拿獲陳坤山劉玉元羅木耳子王尙魁岳金岳才呂子譙大五許老五廣元縣拿獲苟管事羅老五李子沅左國松通江縣拿獲黃廷映閩中泉萬級三陳寶山夏志超東鄉縣拿獲陳大五李大五楊大五文洪恩徐五儀隴縣拿獲許仕潛閩山縣拿獲高欽洪先後稟報到臣當經批示或委員緝拿或解送保衛府提審如係賊害汛官時在場助勢者立予正法其實係脅從者分別繫釋遞解管束以期毋枉毋縱各在案伏查川省人心浮動伏莽堪虞匪類竄民往往勾結爲患此案陳坤山苟管事輒敢勾結匪黨誘串窮民糾衆橫行將南江汛官鎗斃情近叛逆而應從嚴拿辦以遏亂萌再南江汛把總陳仲溶帶兵攔截被賊賊害實堪憫惻合無仰懇 天恩飭部將把總陳仲溶照陣亡例議卹以慰忠魂而昭激勸得旨知道了卽著嚴飭營縣務將首夥各匪悉數拿辦毋任漏網陳仲溶著照陣亡例議卹該部知道○壬子 上御乾清宮受餼○甲寅 萬壽聖節 上詣 大高殿 壽皇殿行禮○是月奧大利亞國使臣畢格哩本回國參贊古典福和署理○日斯巴尼亞國新簡駐華使臣德拉拔抵任

閏六月庚申李鴻章奏本年六月以後陰雨連旬河水驟漲迭飭各河道認真防險搶護茲據永定河道萬培因稟稱自六月十八日起至二十四日連日大雨如注河水陡漲至三丈七尺奔騰直下蘆溝橋翅

過水尺餘南北兩岸各工或沈陷埝段或坍塌埝身奇險迭出均經督飭屬汛員弁竭力搶護漸就平穩
惟北三工之十二號北二上之五號因大溜橫激水過堤頂埝身塌潰當即購買土料撒手搶辦多方抵
禦經三晝夜河水愈漲風急浪猛先後漫溢過水正搶辦間據南上汛二號稟報灰壩大溜頂衝金門與
壩臺相平適東北風驟作水勢擡高金門宣洩不及直衝背埝頭並壩臺一擁而過水高龍骨七八尺高
過壩臺二尺餘大溜側注由壩臺下搜刷過急致將接連北壩臺之二號直堤頭淘潰十餘丈仍在拚命
搶堵不意河水續漲溜勢愈猛風狂雨大黑夜人力難施至二十四日子時漫口四十餘丈業已奪溜其
北三工北二上汛兩處已成旱口稟請多辦前來臣查永定河身久經淤高兩堤全係浮沙汛漲本易潰
漫若論治法惟有改河另築邊堤方可一勞永逸無如巨款難籌民情不順僅能隨時補苴近年上游河
形側注北岸每遇汛漲輒即漫溢大溜過注金門關繫尤重臣於十六年北上大工後再三籌畫不得已
思避重就輕之計因飭臬司周馥道員吳廷斌詳察全河形勢令在蘆溝橋下挑挖中洪引河導溜向南
直下俾灰壩過水藉資暢洩原知盛漲之年南上一汛必形喫重但舍此別無長策灰壩外原有引河由
小清河匯入大清河多係河道素少民居設過漫溢為害尙較輕減此次北三工北二上汛同時過水若
非灰壩擊溜南趨則水口必在北岸淹沒之廣堵築之難較之現在情形更難措手本屆伏秋未交即值

連旬大雨石景山水誌二丈四尺歷屆從未漫過此次漲水竟高出水誌三尺而自十八至二十四日有漲無落是水勢之大歷時之久實爲向來所未有灰壩本係減水之區雖與別處堤工搶護不力者有間惟既經溜成口自有應得之答應請 旨將屬員署南岸同知夏人傑汛員霸州州同周蓉第均革職留任其前經漫水現成早口之屬員石景山同知賀延麟署北岸同知周起濬汛員夏鄉縣縣丞韓傳琦涿州州判唐煦均摘去頂戴以示懲儆永定河道萬培因統轄全河疏於防範應請革職留任 旨督率無方並請 旨交部議處現在伏秋大汛爲日正長上游各堤防仍嚴飭竭力搶護毋再疏虞並將漫口趕緊盤築塞頭以防續塌一面由 臣遴派委員前往詳細勘估籌辦並設法播歉濟用此次漫口之水循灰壩減河並低窪處所歸入大清河新城雄縣一帶驟添盛漲已飛飭清河道及各州縣加緊防搶仍會商府尹 臣並督飭司局將被災村莊一體確查撫恤 上諭李鴻章奏永定河堤工漫口分別參辦並自請議處一摺本年六月以後永定河水勢驟漲險工迭出北三工北二上汛先後漫溢現成早口六月二十四日南上汛灰壩漫口四十餘丈該管各官疏於防範實屬咎無可辭著南岸同知夏人傑霸州州同周蓉第均著革職留任石景山同知賀延麟署北岸同知周起濬良鄉縣縣丞韓傳琦涿州州判唐煦均著摘去頂戴永定河道萬培因著革職留任李鴻章著交部議處該督務當督飭在工員弁將漫口趕緊盤築

襄頭以防續端並迅籌款項及早堵合其上游各汛並著督飭認真防護毋得再有疏虞○諭胡聘之奏已故知縣虧短交代請革職查抄一摺山西已故夏縣知縣穆長春前在夏縣任內虧短正雜各款至二萬八千餘兩爲數甚鉅穆長春著卽行革職由該護撫提集該家屬丁冊人等嚴訊是侵是挪按律懲辦並將該故員任所寓所有無實財查抄備抵其原籍家產卽著正白旗漢軍都統一律查封以重庫款○辛酉諭總理海軍事務衙門奏各省解濟海軍鉅款請將籌辦諸臣量予獎敘開單呈覽一摺李鴻章於海軍鉅款悉心籌畫獨任其難張之洞等亦均能力顧大局殊堪嘉尚大學士直隸總督李鴻章前兩廣總督現任湖廣總督張之洞均著交部從優議敘兩廣總督李瀚章前兩江總督安徽巡撫沈秉成前湖北總督盛京將軍裕祿四川總督劉秉璋前江蘇巡撫現任浙江巡撫崧駿前江蘇巡撫現任廣東巡撫剛毅前湖北巡撫現任熱河都統奎斌湖北巡撫譚繼洵江西巡撫德馨前任直隸布政使現任漕運總督松椿前江甯布政使現任河東河道總督許振祿前四川布政使現任貴州巡撫崧蕃前署廣東布政使現任湖北布政使王之春廣東布政使成允江甯布政使瑞璋江蘇布政使鄧華熙前署湖北布政使現任湖北按察使陳寶箴江西布政使方汝翼直隸按察使周馥前兩淮鹽運使現任江西按察使福裕兩淮鹽運使江人總均著交部議敘○壬戌余聯沅奏見京城內自六月二十七八等日起蝗飛自

北而南復由南而北田野蔽天不可數計聞武濟等州縣禾稼受傷不少各地方官何以不早撲捕致令
鼓翅飛揚蔓延如此之甚昨聞邸鈔見沈秉成奏安徽各屬蝗蝻孽生多寡不等又聞江蘇之各州縣亦
復蝗蝻遍地山西自去年大旱至今未得透雨聞亦有蝗蝻之爲災無時無之但得良有司竭力搜除
自不致有害苗稼伏讀 列祖聖訓於捕蝗淨盡者交部議敘貽誤地方者照例治罪並派大員督同查
捕不得回護諱飾仰見 列聖禦災捍患軫念民瘼之至意今蝗延南北直入近 畿現在飛往何處而
宜跟蹤追捕以衛田禾相應請 旨飭令順天府府尹暨各該省督撫督同地方官於有蝗處所趕緊捕
治倘不實力奉行從重參辦庶民害以除而農田可保雖有災而不爲災矣 上諭前因京師見有飛蝗
當於本月初三日召見順天府府尹孫楫飭屬趕緊撲捕並查明經過地方禾稼有無受傷詳細具奏茲
據御史余聯沅奏飛蝗遍野請飭撲滅等語卽著李鴻章祁世長孫楫各飭所屬認真辦理一面將田禾
是否受傷及現在情形卽行具奏○癸亥諭光裕等奏 陵寢祭器被竊違旨嚴審值班官兵分別參辦
一摺此案防禦景祿於班期之內外庫門鎖封破裂並不卽時呈報雖訊無偷竊情形實屬任意玩愒不
以庫儲爲重著交部嚴加議處防禦德海蔚春多存含混接班有意瞻徇禮部員外郎慶錫於庫存祭器
雖無看守之責然祭器在庫遺失亦難辭咎均著交部議處總管和貴翼長祥安巴克什事前疎於防範

著交部察議值班甲兵禮部差役卽著分別實革所失祭器仍著光裕等札行附近州縣並督飭所屬旗
綠員弁一體嚴密訪拿務獲正賊從重懲辦另片奏開復防禦文鐸既有私造假情事請暫革職等
語文鐸著卽行革職歸案訊辦○甲子諭本年六月間順直各屬雨水過多各河均報漫溢順天保定天
津河間等處被災甚廣閭閻困苦情形殊堪憫惻加恩截留江蘇河運漕糧五萬石江北河運漕糧五萬
石以備順直賑撫之需著李鴻章會同祁世長孫毓汶督飭所屬詳查災區輕重妥爲分別核實散放務使
實惠及民不准絲毫弊混用副軫念民艱至意其隨情輕濟等項銀兩並著查照成案核數提存解交賑
局備用○劉秉璋奏川北土匪陳坤山苟管事周豐刀等滋事戕官臣當將拿辦情由具摺奏明在案該
匪由南江復竄東鄉沿途聚集有三百人踞於東鄉縣屬之樊噲殿一帶地方經前派出帶字營管
帶孫紹發長勝營管帶姚振榜劉玉田陸續拔隊取齊與署東鄉縣知縣張蘭督團會合進攻該匪膽敢
拒敵接仗我軍奮勇撲擊鎗斃如雨聲戰逾時斃匪三十餘名受傷者無算匪不能支穿山過林而逸生
擒郭得賠等五名旋又陸續捕獲夥匪熊武沅等二十餘名並搜出號片各數十張據供陳坤山與苟管
事等先後合股謀爲不軌令伊等潛往各處散給號片邀約匪黨齊集木頭市起事等供是日該匪向太
平城口一帶奔竄各該弁勇不分晝夜跟蹤追捕該匪所過場市先經各屬集團嚴防不能撥入一無所

掠係由邊界荒僻之路奔逃經營勇追獲生擒王金山等九名傷斃謝朝子等二名旋卽竄入陝境掛城
口關蔡右年率團追擊鎗斃夥匪八名擒獲大名又經太平縣楊汝偕追擊擒獲五名該匪竄至陝省紫
陽定遠等縣早經臣查明陝省會拿是以陝境州縣早已整備該匪被陝軍圍剿擊不能進竄乃回竄
太平之大竹汛王家溝等處正值孫紹勳劉玉田等督隊入陝會剿相遇之下遂卽圍攻尋斃要匪馮機
匠等二十餘名生擒楊華山等二十四名並獲首匪張占輝卽張迥子奪獲擡礮鳥鎗刀矛二十餘件其
時餘匪多由襄陽四散奔逃連日搜捕並無匪蹤是役也營勇役團先後受傷者亦各十餘名該營縣旋
接陝省紫陽縣知縣楊調元函稱已將此案首要周豐刀拿獲飛稟上司先行正法陣斬數名生擒十餘
名等語由營務處徐春榮彙報前來查此案首匪陳坤山苟管事早經巴州廣元拿獲張占輝隨亦拿獲
周豐刀又經陝省拿獲其餘所獲各匪經臣一併批飭訊供分別正法勅示一面分檄孫紹勳酌留一哨
駐防巴州一哨分駐保寧劉玉田酌留一哨駐紮定令各搜捕餘匪以期盡絕根株餘營分飭回防伏
查廣元巴州太平城口緊與陝界毗連盡係高山老林嘉慶年間教匪於川陝地方滋事先皆伏匿山林
不卽撲滅致貽巨患此次臣分飭各勇營及營縣拿捕嚴飭實力窮追搜捕不准鬆懈該營弁兵團頗知
効命未及匝月陣斃多匪捕獲多名皆從餘匪盡已碎散故事頗速尙屬著有微勞可否擇尤酌保數員

以昭激勵恭候 聖裁至陝省員弁拿獲鄰境首要已咨明陝西撫臣查明出力之人酌予保獎合併
陳明 上諭劉秉璋奏剿辦川北土匪拿獲首要各犯地方肅清一摺四川川北土匪陳坤山等戕官滋
事經劉秉璋派令營縣各官會同進剿先後獲匪數十名擒獲郭得廣等多名其竄陝西境內各匪亦經
陝軍截擊會剿擒斬甚多首匪陳坤山等均經擒獲正法辦理尙爲妥速在事出力員弁著准其擇尤酌
保毋許冒濫○丙寅諭本日召見山西巡撫阿克達春於詢問事件奏對均未明晰著開缺另候簡用○
以楊頤爲都察院左副都御史○戊辰諭張煦爲山西巡撫以吳大澂爲湖南巡撫○以長麟爲內閣學
士○甲戌前戶部尙書檉恂卒賜卹如例○以徐會灃爲內閣學士○丙子李鴻章奏旅順口內建造大
石船塢並船澳庫各工於光緒十六年秋間全工告竣當經驗收奏明在案復由臣遴派直隸候補道
龔照瑛前赴旅順會同原辦道員劉含芳設局開辦查船塢所管機器吸水銅鐵鍋爐木工舢板各廠多
至十餘座兼管存儲料物煤炭各庫暨電燈泊岸艇棚各項事宜工作極繁在在需人勢難減省現就開
辦情形按事分派以職司之繁簡定人數之多寡以工藝之優劣定餉額之高下分別等第撙節酌定統
計員司弁工匠徒夫役人等每月額支薪糧公費等項約需銀七千五百十四兩有奇每年約共支銀九
萬餘兩自光緒十六年八月初一日起支在於北洋海軍經費項下按月撥給彙案造報其每年採購料

物應視工程多寡購備存儲實用實銷未能預定數目據辦理海防支應局司道等詳請具奏前來竊維北洋創辦海軍歷年添購鐵甲鋼快等船規模略具從前並無修船巨貲遇有修理要工必須駛赴日本香港各洋廠諸多不便自旅順造辦石船鳴各戰艦均可就近修理無須借資外國緩急可恃洵為海軍根本至計查海軍衙門奏准章程內載旅順船塢每年工料經費銀二十萬兩如過工程較多原定經費實有不敷准核實估定另行添撥等語此項月費薪費係就現在海軍各艦常年應用各工撥節核定無可再減至鎮遠定遠等船行駛有年船身機器應修之處甚多不特將來大修必須另行請款即每年歲修遇有情形較重之處亦須添雇匠役趕緊修理以後續增艦艇添建廠庫工作日廣用人較多薪費一項尚應照章酌加免誤要工應俟隨時據實核辦仍飭將實用工料台數另行彙案造銷所有酌定旅順船塢員司匠役人等月支薪費數目除將清單分咨海軍衙門戶工部查核外理合附片陳明得 旨該衙門知道○庚辰諭有人奏職官重徵餘租敗壞馬政請飭查辦一摺據稱奉天莊糧衙門委署主事全祿等結交副都統衙門門丁康大年勾串合謀將餘地租鈔勒催肥已現有闕成凌因無力完繳呈訴拏打收禁全祿又革去莊頭懸缺賣錢侵吞豆折銀兩大凌河官馬缺額廢弛馬政請飭查辦等語著裕祿確切查明據實具奏勿稍徇縱原摺著鈔給閱看將此諭令知之○子故大學士恩承照例賜卹入祀賢

良輔伊子文森以主事分部行走○以鍾明亮爲江南瓜州鎮總兵○辛巳以符珍爲內大臣○命翁同龢充會典館正總裁費恆副之○壬午調載漪爲鑲藍旗滿洲都統以懷塔布爲正黃旗漢軍都統○癸未許振祿奏臣於月前巡歷兩岸遍諭屬員以今歲情形斷不能如去年之通工無險所以備石則已及萬方礮料則均爲足額凡埽段定限於四月鑲齊土工定限於五月告竣以爲先事預防庶可出全力以待大汛之至先是各處亢旱沁河則終年不能行丹黃河則散漫亂流近岸有工之處石船竟不敢送到不意自六月初旬以來時而有竟日之雨時而有半夜之雨傾盆瀉注水勢浩溢沁河寬於二十三日漲至一丈一尺有餘而衛輝府水已圍城則山西之迭禮大雨可知也黃河則除萬錦灘接續遞報漲水外而汴省所近黃河實於二十三日亦漲至一丈二尺有餘則上游陝甘以及近河地方之迭禮大雨可知也臣前疏所云有經年之久旱必將有經旬之積雨蓋盈虛消息自在意中今果險工迭出幸處處有備不至遇事張皇查黃河以南岸爲最險而上南關屬爲尤甚今自經督三年屬員修守有寶石壩得力凡大溜側注俱仍撇入中洪素險者得就無虞此則多拋碎石之有用也中河一關平常屢次報險者今則防禦穩固獨中牟下汛三堡順堤自二十一埽至二十九埽計工九段均係光緒十七年緩修之工茲因河水驟漲大溜側注致將各埽刷墜入水經該關趕緊集夫搶鑲層料層土盤壓穩定填實抵禦此則

多備積料之足恃也其餘各屬雖均報增段之間有低墊溜勢之不免側垂以及水溝浪窩之經雨迭出然實無日不鑲增無時不培堤兩中則不停工作兩後卽急爲修補仰蒙 聖主垂念民生籌給帑項凡風雨泥塗仍在工臣子所當竭力趨事之日近時大汛方長雨勢未已 臣再三嚴飭工員切不可貪天之功憚於興作務當兢兢業業慎益求慎於無事時常作有事之想且必晝夜巡查晝夜操作則雖雨多河漲必不至達有意外之慮仰祈 聖慈諒寬 懇系至誠沁所屬之木藥店龍王堂增工前歲已猝出奇險經 督飭道廳繕完堤岸增築石壩在案惟督後工程尙須籌備石方亦經 臣撥款買石在案不料去歲一年水不及尺船不能進今竟驟漲丈餘此水來源遼隔山西連峯疊嶂水勢洶急從高瀉下勢不可測現已多派監工得力之員協同屬員防守一面飛催石船卽日駛入以備加拋抵禦自改軍以來凡款項石料隨時添益均應責之於 臣不令屬員爲難所有逐處防禦先事籌畫亦應責之於 臣不諉他人分過 臣亦不敢因天事無定故作危險之詞以瀆 聖聽惟細察中河廳屬八堡順堤人字壩及九堡托頭托二等壩情形實爲喫重緣此係當日牟工失事之地堤岸仄狹土性純沙近岸無從取土向來濬勢稍寬今則濬塌僅存二丈此必當趁此大溜築兩大壩方足抵禦目下大汛方長款項不敷 臣欲待霜後就款築壩則恐失於太遲只得先發銀萬兩派員飛速運石卽刻築壩隨後復撥鉅款買石添拋查現在河

溜深至二丈有餘計所用碎石必多然趁此盤壓得住將大溜刷入中洪則其工可以保守其款庶不虛糜似未可拘泥而誤緊要也此外再建一壩則須審度情形就款爲之惟去歲河勢平安霜後得存八萬之款盡付買石今年大雨暴漲頗費其益此次派築二壩誠恐稍後不能盈餘多買碎石然險工防住亦足爲來年修守之資報聞○福潤縣才前因節交庚伏洪水漲發該縣將出省駐工親督防護緣由於六月二十七日奏報在案拜摺後即赴工次嚴督各員弁將險要工程晝夜搶辦所有雙合嶺清河鎮五楊家灣子灣等處盤陷壩壩並衝刷堤垣均已鑲修平穩惟洪流洶湧異常海漲未落新漲又來迭准東河督臣咨會沁河於六月二十二日水漲五尺八寸二十三日又陡漲六尺萬錦灘二十五日水漲二尺山東河身較窄溜勢更形提高拍岸盈槽驚心駭目據各員弁稟報上游陽穀縣莊縣張縣孫樓被水衝盤壩十分危險參將張仕忠於雙合嶺穩固之後即率勇夫前往搶鎖總辦道員姚協贊亦赴工會督辦理中游平陰縣大生莊畢家林劉屯鄧莊齊河縣豆腐窩五里堡南壇王莊趙莊顧家溝席家道口李家岸邱家岸曹家營王家莊歷城縣史家陽桃園倪家莊劉家莊西紙坊淺溝西邢家霍家溜秦家道口小韓莊等處或壩壩被衝或堤埝刷損此鑲彼盤在在堪虞而五里堡南壇史家陽尤爲險要總辦道員張上達往來督率搶護力與水爭並添購料碎石激勵民夫幫同工作長清縣南岸顧莊槐家廟一帶

民修護莊園埧留有低處以備疏洩積水被黃流灌入衝刷埧身十餘丈奴才添派道員潘廷祖並嵩武軍一哨勇丁馳往保護大堤據埧堤基尚高可無妨礙該處連年被淹小民多居堤頂亦無損傷人口等語現已飭令賑撫局委員查勘撫恤此上中兩游搶辦各處險工之情形也下游濟陽縣張辛莊鄆家渡萬家店宜莊劉莊五當廟荀陽莊北河套齊東縣沙窩楊家古城縣齊家莊惠民縣歸仁鎮潘王莊張佩環莊邢家崖南北王莊涇州沙土鎮家張王莊等處先後據報出險埧壩各工有鑿與水串者而萬家店兜溜坐灣危險尤甚總辦道員李希杰在惠民等處搶辦險工相距較遠奴才派候補知府多培前往督率辦理竭數晝夜之力始克轉危爲安此下游各處搶辦險工之情形也現當中伏河水有漲無落兼以大雨時行山水匯注各營委紛紛稟報奇險環生奴才居中調度飛飭在工各員弁分投竭力搶護如仰邀 聖主福庇天氣時露水勢不再加漲似可無虞惟歷城縣北岸之史家場因對岸生灘大溜夾臥埧前水深四丈有餘隨鑽隨鑿危險萬分張上達飭令加築套堤二百餘丈以資抵禦誠恐緩不濟急奴才現派道員潘廷祖丁達意再行設法搶辦並搜羅碎石迅速運往拋護能否化險爲夷尚無把握惟有竭盡忠誠督飭各該員認真辦理以副 宸廑得 旨知道了卽著督飭在工員弁竭力搶護毋稍疏虞○甲申諭本日刑部奏審明擅入禁門人犯按律定擬一摺已依議行矣禁門重地理宜慎重乃近來值班

官兵等日久生懈怠忽偷安任令閒雜人等隨意往來殊屬不成事體此次該犯陸喜手持金刀擅行闖入禁門所有各門未經攔阻之值班官兵等著兩翼前鋒統領八旗護軍統領查明據實參辦嗣後各該管大臣嚴行申諭各門值班章京等加意防範不准稍涉疏懈倘有仍前怠玩疏忽之處卽著嚴行參處毋稍瞻徇○諭前據御史林啟奏福建陸路提督孫開華剿辦德化匪徒日久無功並所部弁勇有據掠等情當經諭令希元確查具奏茲據希元查明參奏此案副將余宏亮經孫開華咨調派令剿辦匪首陳掛盤踞之後宅鄉該副將於陳掛逃竄後將容留陳掛各鄉房屋燒燬二百餘所累及無辜良民勒繳軍器又多索擾實屬荒謬總兵銜浙江象山協副將余宏亮著卽行革職福建陸路提督孫開華於余宏亮肆意妄爲毫無覺察亦難辭咎著交部議處○諭奎英奏驍員任意虐民有違定制請旨革職一摺署理山西當化廳同知張心泰審理蒙民案件不分曲直輒用重笞並有擅造非刑情事實屬任意妄爲故違定制張心泰著先行革職該員現有應查之款並著山西巡撫按照奎英所咨查明參辦

東華續錄

光緒一百十一

臣朱壽朋敬編

臣張毓英恭校

秋七月丙戌朔時享 太廟 上親詣行禮○丁亥以楊岐珍爲福建水師提督○戊子以孫昌凱爲浙江海門鎮總兵○劉樹堂奏光緒十六年分春潮旺甚驟雨兼旬山水急注下射益以東南風狂捫潮向北衝奪伏之際霖雨連綿漲水泛溢風潮又復大作盡以繼夜南龍頭洄溜湍急搜底刷根秋汛潮更洶湧疾擊猛撲激越過塘以致三防限外埤坦石坦並海甯州大山圩平湖縣獨山石土塘工間多溢損坍險節據該縣備將前項埤坦石坦照章擇要修辦其大小山圩石土工程從前本係民捐民辦兵燹後因民力拮据遂由官辦而平湖縣獨山等處塘工如遇風潮損壞歷經該州縣稟由塘工總局委員勘修造報此次復據該州縣稟報激損失會由局委勘確實隨飭派候補主簿胡有燦會同該州縣暨海防營守備湯廷熊核實興辦所需經費卽在光緒十四年奏准酌定三防歲修附列之大小山圩等處銀款內動給工竣由道彙案造報嗣後三防屬備先後稟報經前任杭嘉湖道鹽紳秦前署杭嘉湖道王景澄督同節次履勘得西塘自李家埠汛西愛字號起至翁家埠汛霜字號止間共埤堤工長三百八丈六尺中塘

自戴家埠汛火字號起至戴家橋汛忘字號止間共埭坦工長三百三十二丈一尺東塘自戴家橋汛命字號起至尖山汛林字號止間共補修頭二層條塊坦水工長四百二十丈七尺埭坦工長一百四十七丈七尺頭二層塊石坦水工長一百二十七丈九尺單層塊石坦水工長十八丈七尺又據委員等確勘海甯州境內大山圩自第一段至十一段間共條塊塘一百七十六丈五尺平湖縣獨山辰字號石塘次東大丈五尺添字號起至歲字號止附土工長四百八十二丈以上各工或柴格激卸或條石掀起關橋激斷塊石漂失甚且埭深顯露附土激卸深寬情形均屬險要自應分別修築理砌加慎以護塘身而衛田廬其埭坦仍令查照歷屆成案辦理由西防同知中防同知東防同知海防營守備海甯州知州平湖縣知縣等先後報由該道等核明飭辦統約估價工料銀四萬八千二百餘兩即由塘工總局於歲額撥金暨鹽課綱恩各款內分別動支核扣部平等款給辦工竣飭委杭州府赴工驗收在案茲據署布政使黃毓恩密杭嘉湖道宗源瀚飭據各工員將承辦工段字號丈尺做法銀數開摺核明會詳前來臣覆查無異得旨工部知道單併發○劉樹堂奏浙江海鹽縣繞城石塘適當海潮頂衝視三防工程尤爲喫重塘身多向東北每遇風潮狂大衝刷撲激猛不可當且地處最高水勢所趨勢若建瓴與浙江之嘉興湖州江蘇之蘇州松江各屬處處毗連全在塘身堅固藉資禦禦建石塘四千六百餘丈自經兵燹大

半坍塌當時以仁和海甯二州縣境內塘工險要不遑兼顧未及議修嗣經各前撫臣陸續修建石塘四百餘丈光緒十二年間秋潮爲患險工迭出經升任撫臣劉秉璋勘明應修石塘二千餘丈以工大費鉅勢難一律舉行僅勘估興辦理砌建復者共計九百餘丈撫臣崧駿抵任後又經籌撥經費加築俾字等號塘外坦水以衛塘身均經奏報在案臣等查海鹽縣塘工緊要應修工程甚多於本年六月間督同署杭嘉湖道宗源瀚親赴海鹽境按塘履勘計光緒十二年間勘明應修未修各縣城西南之率賓等號八百餘丈東北翔宇等號三百餘丈均屬險要原存无字等號石塘從前尚有一二分完整今越時多年坍塌愈甚其早坍者均已露底無餘情形日險實屬刻不可緩之工且西南一帶石塘逼近白洋河設遇風潮吏屬可慮查白洋河爲水利所關現多淤淺若以修塘餘力酌量開濬即以挑出泥土培修附石土塘更爲一舉兩得惟興工必須鉅款查浙江塘工尙有加抽絲捐抵充歲修近數年來撥節支用雖有餘存洋十萬元光景若移作興修海鹽石塘之用不敷尙鉅惟有擇其工程險要次第估辦先修西南之率賓等號次及東北之翔宇等號分別先後以紓財力但塘工絲茶捐連歲旺收歲修不增並可隨時提注設有不敷屆時再行設法妥籌據塘工總局司道會詳請奏前來臣伏查海鹽境石塘瀕臨大海下游之嘉興湖州蘇州松江各郡全賴保衛該郡皆農桑財賦之區民命田廬關繫非細此次臣親往履勘所有

坍塌各工岌岌可危若再因循坐視深恐日甚一日修築更難且塘身正當風潮洶湧之地潮衝汐激工已坍塌勢難抵禦設或海潮內溜下游何堪設想自當急籌修堵並據就地紳士暨請領塘添築坦水以資捍衛惟工程浩大若同時並舉需費甚多計非數十萬金不辦工關險要尤難視為緩圖現與司道等公同商酌查有塘工加抽絲捐抵充歲修餘款累年積存洋十萬元儘數動支尙敷大工用款擬就現有之數先行開辦此後設法騰挪隨時籌撥漸用次第興修俾要工得以漸復下部知之○庚寅福潤奏奴才前將水勢盛漲兩岸險工疊出並史家塢工程尤爲危險情形於閏六月初五日奏報在案查史家塢溜急水深用料鑲壓未能到底卽被衝失奴才見事機萬緊必須以全力爭飛筋在工各員弁併力嚴防毋稍鬆懈總辦道員張上達以勢甚危險於後面加築套堤二百餘丈以資捍衛防營不足繼以民夫奴才復添派嵩武中軍副將杜金標率領所部幫同工作一面派員多購料物運運石塊星夜拋護追拋至離水面五尺許溜勢始向外移趕將衝刷坍塌竭力加鑲並添做大埭數座方得漸次平穩此皆仰賴皇上洪福非奴才和料所能及其餘上中下三游各險工據報分投搶辦或已鞏固或尙在鎮修均可力保平穩惟自入伏以來陰雨連綿水勢有漲無落接准河臣咨會萬鄒濰黃河於閏六月初四日又漲水三尺山東河身浸窄舊險未已新險又生如上游濮州馬劉莊廖家橋靜張縣徐家沙窩影塘東阿縣張

莊股莊張家道口馬家沙河五里營牛屯范家坡等處近又據報衝營壩中游平陽縣孫家溜湖溪渡
朱家園陶家嘴肥城縣傅家岸歷城縣西邢莊任家岸長清縣董家寺黃陡崖大馬頭及枯河挑水壩亦
均出險下游濟陽縣桑家渡郭家紙坊齊東縣柳子嶺升官寨劉先生莊徐家園常家道口余家窪董園
馬開子齊城縣陶王莊沙窩楊家真武廟梨行董家湖縣張莊雙台莊王家院東馮西馮薛家坊馬家
窪十里鋪西紙坊金卜莊惠民縣小崔家劉王莊濱州李家口謝家莊北鎮賈家莊趙家寺楊溝朱家菜
園程家口于家莊台李莊利津縣東關十六戶北嶺子韓家垣傅家窩大田家基家夾河等處壩均
有壩陷堤埝間被刷損情形輕重不一總辦往來督率搶護幾致接應不暇幸員弁勇夫人等均能不避艱
危踴躍用命沿河民夫亦幫同搬土運料晝夜弗懈得以奮力搶辦藉免疏虞洵堪仰慰 宸廑至長清
縣龍莊漫溢民埝水勢業已消退大堤屹然無恙應俟秋後農隙仍飭民間堵修酌給津貼銀兩以工代
賑利津縣南岸梅莊一帶民埝向有分洩口門歷年旁溢之水由此匯歸小竇河入海去歲該處百姓將
殘埝修補完整無從分洩以致北岸驢窩等處陡生巨險本屆伏汛盛漲較去年尤甚驢窩一帶疊出險
工正在危急之際梅莊適下盧莊民埝被水漫溢猶藉由小竇河分洩入海驢窩等處工程藉得搶險無
虞該處地近海濱村莊無多亦應俟秋後察看或仍留作盛漲時洩水口門或瞻民間堵築臨時酌量辦

理現屆秋汛奴才仍當嚴督各員弁認真防守不准稍涉懈弛以仰副 聖主慎重河工之至意報聞○
乙未希元奏閩省運務原額編載歲徵課銀八萬五千四百七十兩零迨後陸續增減共應徵正課一十
五萬三千九百餘兩又溢課一十三萬二千四百餘兩然每屆奏銷約報完銀一十餘萬兩尚苦引滯商
疲相繼倒歇自同治四年改行票運課耗盤三項並徵又裁革陋規銀七八萬兩提充正款故初屆共收
銀至四十萬兩零奏報完數驟增兩倍照此作為定額其時兵燹之後淮浙粵三岸場鹽缺產外省捆販
皆取給於閩省且勁旅雲集島徒忱於兵威不禁自絕官銷之暢莫盛於斯未幾鄰岸復籌營勇亦次第
撤防銷路大遜於前耐情萬分購票運市行三屆即經前督臣英桂奏請永遠減免鹽盤二成嗣第八
屆及十八二十一二十四二十七等屆節經各前督臣先後續請漸減二成盤銀藉以稍紓喘急惟每歲
徵數有定上屆之票尚未運銷下屆之票又須接買更兼勸買額外有票無銷日引月長未運之票積
至數十萬兩官運代辦倒商懸額亦積票至六十餘萬兩為今之計非疏銷不能裕課非敵私不能疏銷
非減價不能敵私非輕本不能減價現據總散商販鄒安達等稟陳銷疲課絀運斷幫危課盤並徵委難
兼顧當日因鹽改票議抽盤金原係暫充軍餉現在軍務早濟商力已竭籲懇設法扶持全免鹽盤以資
補救等情應由福建鹽法道龍錫慶會同布政使潘駿文查明詳請奏咨前來奴才覆加查核洵屬實在

情形合無仰懇 天恩俯念閩越幫情困迫已極准將西路之光澤邵武泰寧建寧建安順寧建陽崇安
南平順昌將樂光溪永安沙縣古田縣之黃田埠並龍巖漳平寧洋及南路之閩縣侯官羅源嶺江閩清
等二十三幫現完六成並奉准暫減二成鹽釐一併暫免以恤商艱一俟商力稍蘇隨時察看情形漸圖
規復其餘縣澳各幫尙可支持仍令照繳全釐以重課賦得 旨如所請行○丙申升奏奴才前將印
度擬約各款藏番逐條遵從惟續款第二條五年後再擬改關添口暫不遵依已據保爾轉呈印度尙未
札覆各緣由具奏在案茲於六月初四日准赫政函遞譯出印度後三款辦法函內並陳明印度國家應
允於末款刪去改關添口仍照去歲初遞意見各款末條十年後如有應行變通更改之處於六箇月之
前聲明兩國各派員議辦惟十年爲日過久改作五年以便覈定稅章等語奴才復將各款核對均無異
議惟查通商條約歷載成案半係十年後始議更改章程此次印度請定爲五年議改奴才迭次陳明商
務未能諳悉已擬電由赫政暨五年概不納稅一節一併請示總理各國事務衙門核定遵辦一面專派
行營守備耿紹宗前赴西藏會同駐藏開導委員傳諭商上另備譯行飭取全案遵依圖記切結以憑定
案復查商上迭次來稟請於通商約內註明英商抵關貿易不得擅入關內去歲印度遞來初次意見各
款末條十年議改章程一節奴才曾據譯行商上稟稱請於約內加入必須藏印兩相情願一語藏番愚

頑成性此番事已定局不能不預陳印度可否能於約內增入庶免疑貳方可期諸久遠均由奴才函覆
赫政轉達保爾去訖此番取結商上果無異議奴才即不與深求免致多費唇舌赫政函內復稱印度欲
向西藏行茶且引藏番前次與英西藏盛茶向行西金請仍照舊一語以爲藏中之茶可行西金印度之
茶自亦可行西藏方爲平允並請不必列入約章以期活動且云禁阻藏番不准販賣印度之茶即不可
行西藏當經奴才函覆盛茶引地我國家例有限制不容攙越但與貴國邦交誼重刻下既不入約僅
可俟通商開關後再爲一面開導商上一面請示總理各國事務衙門酌核飭遵至請禁阻藏番不准販
賣殊非開誠布公之道於中英交誼大有窒礙等語以期輕輟漸少枝節不至叢生從此警後早定邊患
潛消上紓 聖主西顧之憂大局幸甚奴才幸甚一俟赫政覆函如何定議再行奏 聞得 旨該衙門
知道○丁酉 上諭 建福宮行禮○諭軍機大臣等有人奏山東捕務廢弛請旨飭辦一摺據稱濰縣
匪徒李二糾黨肆劫盤踞斜山地方高密安邱諸城一帶均被其害昌邑被害尤烈本年五月濟甯州屬
之平度店突有盜匪三十餘人入店劫掠委員王熙銀物鎗斃僕夫致委員驚悸身死致使通衢大路官
民往來視爲畏途請飭認真緝捕等語該省盜匪橫行地方官概置不問實堪痛恨著福潤督飭各該州
縣趕緊捕拿務獲懲辦其捕務廢弛之州縣並著查明嚴參免致釀成巨患原摺著鈔給閱看將此諭令

知之○己亥諭兵部奏遵議提督處分一摺福建陸路提督孫開華於副將余宏亮所部弁勇擾累鄉民毫無覺察經兵部議以降三級調用不准抵銷寶屬咎所應得惟念該提督從前尚有戰功現在陳拱業經拿獲所有應得處分著加恩改爲革職留任該提督務當感愧奮發力戒盛滿嚴明約束認真操防以贖前愆倘再仍前玩泄朝廷惟有執法嚴懲不能屢邀寬典也○辛丑諭王文韶等奏各屬水災較廣賑需甚鉅懇恩撥款接濟一摺本年春間雲南昭通東川各屬普旱收成歉薄六月以後又復陰雨連綿山水暴發河海同時猛漲以致昆明等十六州縣田禾被淹廬舍亦多坍塌小民蕩析流離實堪憫惻加恩著照所請卽由戶部迅速籌撥銀十萬兩以備賑需仍著該督等督飭所屬分別災區輕重妥爲散放務使實惠均霑毋任稍有弊混用副朝廷軫念民艱至意○諭鹿傳霖奏川匪竄入陝境擒獲首要各犯地方肅清一摺四川匪首周錫兆等竄擾陝西境內經紫陽縣知縣楊調元與都司蔣光樓等督勇剿斃匪數十人並將匪首周錫兆擒獲其竄擾定遠關之匪亦經該處弁勇迭次擒斬甚多並拿獲周錫兆之子劉崑山一併正法辦理尙爲妥速在事出力員弁著准其擇尤酌保毋許冒濫○福潤奏奴才前將秋汛盛漲極力搶護險工情形於七月初一日奏報在案現在水勢頓伏汛大三尺有餘較十六年盛漲之時大四尺有餘溜勢之猛汛漲之久爲歷年所未有據東河督臣卞寶第錦濤於閏六月二十九日又漲

水三尺奴才於工次屢接委各員馳報險工迭出緊急萬分嚴飭各員弁督率營勇激勵民夫力圖補救如前齊河之五里堡蒲州之東劉家利津東關及傅家窩各處險工已據報搶堵平穩其續報之齊河王莊濟陽鐵匠莊蒲臺薛家坊等處亦均於萬分危險之際幸已搶護無虞惟平陰縣鄧莊歷城北梁口章邱華莊臨河民埝各有漫溢該處大堤均守護穩固漫水仍歸入正河尚無妨礙正飛飭各處一體小心防護茲據下游總辦道員李希杰稟報惠民縣北岸南北王家廬下之白茅民埝於閏六月二十九日戌刻大溜滾刷埝頂比卽搶築子埝維時風雨交作浪湧如山水從埝頂漫過頃刻刷成口門三十餘丈勇夫拚命搶築漂沒數名隨築隨塌次日漸刷至一百餘丈奪溜北行直趨徒駭河入海又利津北岸王莊廬下之張家屋地方於二十九日丑刻埝頂漫溢將新做後戴金口衝刷塌陷三十餘丈又據報濟陽縣桑家渡民埝於七月初三日陡出漏洞正在併力堵壅而外面水與埝平風狂浪急瞬將埝身衝刷三十餘丈該處南關灰壩經大溜淘刷只剩堤後土戢至初四日亦被衝刷四十餘丈與桑家渡之水但至惠民匯白茅墳漫水併歸徒駭河奴才聞信之下愧懷莫名正在續摺具奏復據濟東道張上達稟報南岸章邱縣漲溝廬下之胡家岸民埝水與埝平初七日北風暴作益形洶湧水漫埝頂而過員弁人等隨即退守大堤時當昏夜來源勢若建瓴埝身紛紛卸遂於是日子刻塌陷成口該處堤外地勢低窪光

緒十一年漲溝曾經漫決堵合其費工力本屬汎漲過大屢瀕於危均經設法搶住今因水高於埵致被衝及大堤水由從前漲溝決口竄路入小清河之羊角溝入海等情奴才竊維黃水性極剽悍山東河面甚狹溜力愈勁全恃堤埵爲之捍禦兩年因經費支絀未能培植今值秋汛奇漲水勢高出堤頂排山而來子念搶築不及當屬無從措手惟防汛文武員弁究屬防護未周雖漫溢工段均在保固限外未便稍從寬減應請將承防之都司王恆德副將陳長發張文彩副將勝均革職委員候補知縣王建昭趙惠霖等賜卹試用從九齊宗綬均革職留工提調候補直隸州知州李恩祥候補知府郝廷珍均摘去頂戴以示懲儆總辦滿東道張上達候補道李希杰雖因工段太長照料不及惟所管地面既有疏虞相應請

旨交部議處奴才督率無方責無旁貸並請 勅部議處俾屬員倍知懲懼現飭將各處口門盤做裏頭免致續塌俟水勢稍平卽當趕籌堵合應需款項容再核實估計奏明辦理其黃水經過地方已飭賑撫局司道委員分投查勘被災輕重分別賑恤刻下節過酷暑秋汛爲日尙長仍嚴飭在工員弁加意防護力保完善之區 上諭福潤奏惠民等處堤埵漫溢請將在工文武各員分別參辦並自請議處一摺本年閏六月二十九日山東惠民縣白茅境民埵水勢盛漲漫過埵頂口門刷至一百餘丈利津縣張家屋

亦於是日被水衝塌埵身五十餘丈濱陽縣桑家渡民埵及南關灰壩於七月初三等日均被衝塌三四

十丈章邱縣胡家岸民埝塌陷成口水勢衝及大堤在工各員未能立時搶護實屬咎無可道都司王恆德副將陳長發張文彩閻得勝均著革職候補知縣王建嘯趙惠霖梁錫勛試用從九品雷宗綬均著革職留工候補直隸州知州李恩祥候補知府郝廷珍均著摘去頂戴濟東道張上達候補道李希杰均著交部議處該撫務當督率在工各員迅將各處口門盤築裹頭免致續塌一俟水勢稍平卽飭趕籌堵合其上下游完督各工並著分飭各該員竭力防護務臻穩固毋得再有疏虞餘著照所議辦理該部知道

○壬寅 上諭 奎先殿 壽皇殿行禮○癸卯李鴻章奏於光緒十八年三月二十八日准總理各國事務衙門咨以俄國使臣喀希呢赴總署申請議接海蘭泡琿春等處陸路電線請派大員會商辦理奏奉 硃批著派李鴻章與俄國使臣妥商奏明辦理欽此欽遵 卽飭派總辦電報事宜津海關道盛宣懷與俄使所派之駐津領事官王厚在津商訂磋商數月議定華洋文條約十款大致與前任俄使庫滿所訂接綫條款不甚懸殊當將議訂接綫條款一併鈔咨總理衙門詳加覆核悉臻妥洽本年閏六月十五日已由該衙門鈔錄條款進呈奉 硃批依議欽此並由該衙門繕譯清文咨送到 卽由 盛照繕漢文於七月初四日在津先行畫押蓋印交俄領事寄京與俄使喀希呢印押其俄文法文則由該使在京先行畫押蓋印仍交俄領事寄津與 臣印押齊全已於七月十五日各自分執 臣查中國陸路電綫

創自光緒六年經營十餘年布滿各省瞬息萬里官商稱便惟丹國大北公司海綫先於同治十年由香港廈門通遼至上海一通新嘉坡檳榔嶼以達歐洲名爲北綫俄丹早有連綫之約嗣後英國大東公司水綫亦由福州至上海英丹復有合辦之約其始英丹兩國湊集巨款製造水綫來華原欲併收中國通商各口之電利故同治九年英使威妥瑪曾有各海口准其設立水綫之議速各行省自設陸綫併拆去英丹在滬粵已成之陸綫彼乃知中國已能自守境內之權利不可復奪遂欲獨專中國與外國往來電報之利迫我之吉林黑龍江綫成與俄之東海濱境內咫尺毗連該公司深慮中俄綫接分奪其生計惟恃俄丹交密並有海參崴約章在前俄雖欲自利仍不能不保護丹國之利而各國洋人之在中國者聞中俄接綫皆願陸綫與水綫跌價相爭使洋人寄洋報可佔便宜此不特俄丹所不允卽中國電局亦無力與之跌歸且丹英水綫到中國已二十餘年被洋商無法使水綫跌價亦何能獨使陸綫跌價以遂其漁人得利之謀現在中俄定議上海福州廈門香港該公司本有水綫處不與爭跌留其生計該四口以外各口電價亦不准水綫公司爭跌庶使華綫各分其利如以後水綫減價則中俄電綫亦同時照減辦理其爲平允與總理衙門往返函電互商均屬妥協至展造恰克圖綫應用造綫經費甚鉅並常年養綫用款繁重擬飭總辦電報事宜盛宣懷勸諭華商電報公司設法添招商股二十萬歸商認辦以免另

籌官本以後邊界既經接綫凡京津等處出洋電報必須將京津等處至海參威連春恰克圖內地報費由我酌量全行豁免祇收條款內應分來往經過之電費自應仍歸華商電報公司收取除抵過路兌內地報費外即以抵展追恰克圖電綫經費及以後此綫常年修巡之費以期持久而免廢弛此又中俄接綫以後所擬之辦法也奏入報聞○甲辰以謝文俞為江南浦州鎮總兵○乙巳以陳金鼐為四川松潘鎮總兵○劉坤一奏准軍機大臣字寄光緒十八年六月十七日奉 上諭有人奏大員劣跡昭著列款糾參請旨飭查一摺據稱升任山西巡撫前安徽布政使阿克達春不通文理專倚幕友劉介臣賄人鄒姓為左右手以致把持招搖遇有派差委缺必經彼二人議定價值始行札飭知府李成龍知縣吳本仁均以賄賂而得補署又有收拜門生令屬吏按時餽送等情皖省支應局有存儲銀十數萬兩阿克達春到藩司任後巧立公費名目隨時提用甚至僕婦家丁均按月向局開支虧項甚鉅等語所奏是否屬實著劉坤一確切查明據實具奏毋稍徇隱原摺著鈔給閱看將此諭令知之欽此仰見我 皇上揚清激濁好問察言跪誦之餘莫名欽佩 當即委員前往安徽按照原奏各節逐細審查耳致參稽已得梗概如原奏所稱阿克達春人甚昏庸不諳文理專倚幕友賄人為左右手一節查阿克達春素性寬和公事尚屬明白惟文理不甚通澈幕友劉介臣即劉汝清係候選知縣賄人鄒姓名鄒培德即鄒植係分

省試用府經歷皆爲阿克達春親信之人翟汝藩小有才能總司文案往來公牘悉同參酌與鄒植聯爲一氣遇事招搖雖賄賈差缺查無實據而該二人爲阿克達春所倚任不復自知防檢屬員中與之交結往還實緣干進實所難免在任候補知府布政司經歷汪湘與鄒植等狼狽爲姦該員爲原奏所無而聲名尤劣又原奏阿克達春最喜收拜門生及親手持贈印箱一節查阿克達春尙無令屬員按時餽送情事其於屬吏稟辭赴任時有無持贈印箱雖莫能得其實跡惟好收門生致鉅營之徒得以藉此階進如道員彭祿松峻袁秉貞知府李成釐知縣王煥熙吳本仁均投拜阿克達春門下該員等官聲均甚平常彭祿爲原奏所無而拜門最早結微尤密知府孫詞林查無其人惟候補知府班中有孫廷林號詞臣或卽係孫詞林之僞孫廷林與道員蕭允文均查無與阿克達春拜認師生之事又原奏李成釐請補寧國府缺餽送銀兩吳本仁代理旌德縣缺餽送翟介臣婢女一節查李成釐江蘇文童以勞績知府於光緒十四年四月到省十六年十二月奏補寧國府缺雖查無餽贈實跡惟該員係阿克達春門生到省兩年迭委差缺殆無虛日又復請補實缺物議之來或由於此吳本仁以婢女送翟汝藩卽翟介臣作妾現聞翟汝藩挈之北上皖中人言藉藉殆非虛語該員與鄒植素相往來未聞有結拜弟兄之事又原奏皖省支應局向有存儲銀兩阿克達春到藩司任後巧立公費名目隨時提用虧額甚鉅一節查安徽支應局

歷年支放各款均取有各處領狀批迴阿克達春在藩司任內尚無巧立名目隨時提用之弊惟從汝和鄒培德等曾在支應局開支薪水有案可稽翟汝和卽翟汝藩月支銀六十兩鄒培德卽鄒植月支銀十兩雖爲數無多而鄒植身係職官充作閑人又借名開支公款尤屬不合原奏謂署中幕友家丁按月向局中開支自卽指此當此經費支絀之時能省一分卽得一分之益安徽支應等局款項皆有開單備要需若經理不得其人難免濫應濫支致滋浩穢應由臣咨會安徽撫臣沈秉成札飭局員認真句稽力加整頓以昭核實而重庫儲臣仰荷 聖主垂詢其漫無依據者固不敢據拾浮言隨聲附和其確有見聞者亦不敢稍涉徇隱上貢 朝廷整飭官常之至意開缺山西巡撫前安徽布政使阿克達春雖查無實據而平日公事假手幕友家丁一任遇事招搖毫無覺察且濫爲結納收門生以致黃緣奔競之風相率成習實屬有負委任應如何予以懲處恭候 聖裁妥徵候補道彭祿松嶮袁秉貞齊國知府李成鼐以道府大員與阿克達春結爲師生專事鑽營巧爲迎合均屬不知自愛有玷官箴應請 旨卽行革職准補太平縣知縣吳本仁另補縣王煥熙著於逢迎居心卑鄙在任候補知府布政司經歷汪湘候選知縣翟汝藩分省試用府經歷鄒植營私植黨貪鄙妄爲應請一併革職鄒植以職官充作閑人尤屬寡廉鮮恥並請永不敘用以儆官邪道府蕭允文知縣孫廷林應請毋庸議 上諭前據御史余聯沅奏

升任山西巡撫阿克達春在安徽布政使任內劣跡昭著列款糾參當諭令劉坤一確查具奏茲據劉坤一查明覆奏阿克達春雖無賄賂差缺收受屬員餽送及巧立公費名目實據惟任用幕友翟汝藩門下鄒植遇事招搖毫無覺察且濫收門生致敗簞緣奔競之風竊屬大員委任開缺山西巡撫阿克達春著交部嚴加議處彭祿等以道府大員與阿克達春結爲師生均屬不知自愛有玷官箴安徽候補道彭祿松俊袁秉真寶國府知府李成龍均著卽行革職准補太平縣知縣吳本仁另補縣王煥熙著於逢迎居心卑鄙在任候補知府布政使經歷汪湘候選知縣翟汝藩分省試用府經歷鄒植營私植黨貪鄙妄爲均著一併革職鄒植以職官充作閹人尤屬寡廉鮮恥並著永不敘用以肅官箴道員肅元文知府孫廷林既據查無拜認師生之事卽著毋庸置議該部知道○戊申刑部奏准軍機處交出大學士直隸總督李鴻章奏匪徒竊毀電報桿綫請明定治罪一摺光緒十八年閏六月二十三日奉 硃批刑部議奏欽此○等語得該大學士奏稱中國創設電綫已閱十年近來風氣漸開推行日廣東北則達吉林黑龍江俄界西北則達甘肅新疆東南則達閩粵臺灣西南則達廣西雲南徧布二十二行省並及朝鮮外藩殊方萬里呼吸可通洵稱便捷然必一無隔閡方能不誤事機誠以由電傳遞之件無論官商皆關緊要若遇軍務之時調度戰守機宜取決俄頃設遇電綫折斷貽誤軍國大計厥咎匪輕近來貴州山西陝西甘

肅各省愚民聚眾拔毀桿綫之案屢見迭出均由各該督撫隨時嚴懲以儆效尤至北洋電報綫路多係濱海津沽蘆臺一帶亦有電綫被竊之案經臣嚴飭地方文武上緊緝拿僅獲一二縱使口供確鑿因例無治罪明文不過枷責了結匪徒無所忌憚竊割如故地方官亦因例無著成緝捕難期得力他省如此類者甚多若非明定治罪專條不足以示懲創而資整頓查律載常人盜官物計贓一兩以下杖七十一兩以上至五兩杖八十以次遞加至八十兩杖係雜犯准徒五年又聚毀官物加准竊盜贓二等誤毀者於官物加二等上減三等又例載驛站馬夫遞送公文事干軍情機密沈匿者不計角數杖六十徒一年此項電綫創設自官係屬官物應緣傳報事同驛遞非尋常官物無關要事者可比竊毀桿綫若按盜毀官物料罪一桿一綫計贓加等罪止杖責不足蔽辜查電報關係機密重務軍情要政無不盡賴竊毀桿綫有礙傳報核與沈匿公文無異商電桿綫亦係奏明設立與官綫處處銜接其傳遞官報僅取半資急公報効亦應一體維持未便歧視嗣後如有匪徒竊毀電報桿綫不論官電商電是竊是毀不計贓數但經折斷均請比依驛站馬夫遞送公文事干軍情機密沈匿者杖六十徒一年例擬杖六十徒一年如係竊盜仍盡本法刺盜官物三字聚毀者照律免刺誤毀者於杖六十徒一年罪上減三等擬杖八十竊毀桿綫均照估追賠以上各節但指尋常竊毀桿綫而言倘有地方奸民造謠聚眾拔毀桿綫至數十里

外者仍隨時察奪情形分別首從比照土匪滋事從嚴懲辦不得復拘常例其失察竊毀桿綫之地保照不應重律擬杖八十折責革役誤毀者免議等因其奏前來臣等查中國創設電綫行之已閱十年原因機密重務軍情要政難殊方萬里可取決於俄頃之間設遇電綫斷折不通貽誤卽非淺鮮乃近來各省愚民輒以事非常常經見妄生疑感聚眾拔毀桿綫之案層見迭出雖經各該督撫隨時嚴懲終以例無治罪明文鮮所依據茲據該督奏請明定專條聲稱竊毀桿綫有礙傳報核與沈匿公文無異商電桿綫亦係奏明設立與官綫處處銜接其急公報効亦應一體維持未便歧視等語係爲慎重電報要政起見臣等公同酌議應如該督所奏嗣後如有匪徒竊毀電報桿綫不論官商電是竊是毀不計賊數但經折斷均比依驛站馬夫遞送公文事干軍情機密沈匿杖六十徒一年如係竊盜仍盡本法刺字焚毀者免刺誤毀者於杖六十徒一年罪上減三等擬杖八十竊毀桿綫均照估追賠倘有地方奸民造言聚眾拔毀桿綫至數十里外逞兇拒捕致傷官兵情節重大者仍隨時察酌情形分別首從比照土匪滋事從重懲辦不得復拘常例其失察竊毀桿綫之地保照不應重律擬杖八十折責革役誤毀者免議似此明定罪名俾承審者得以遵循而匪徒知所儆畏矣如蒙 俞允臣部卽行文該督並各省督撫將軍都統臬尹一體欽遵辦理該督奏稱失察及承緝之地方官作何處分分別重輕並請由部議定俾各自顧考

成庶防捕盜嚴後恐可免等語恭候 命下臣部移咨吏兵二部酌核辦理得 旨如所議行○庚戌

上諭 壽皇殿行禮○以載漪爲崇文門正監督崇光副之○壬子諭吏部奏遵議處分一摺開缺山西

巡撫阿克達春著照部議卽行革職○轉貢卿爲翰林院侍讀學士恩景爲翰林院侍講學士○癸丑諭軍機大臣等戶部奏核雪南銅本運實請照唐炯所奏每百斤暫加銀一兩已依議行矣另片奏請飭整頓銅運等語唐炯係鑒瑕錄用之員宜如何力圖報稱乃自到雲南以來前後奏報銅廠漸有成效迄今已閱三四年辦運之數每年不過兩批毫無起色實屬有負委任現值寬爲加價之時務當激發天良力籌解法遂歲加批倘再空言搪塞任意鋪張著戶部據實嚴參從重治罪其前請加借工本銀兩分年繳還暨運西鑛務暫免課耗現已奏限屆滿均著唐炯迅速清結毋稍遲延至該省近年所解銅斤夾雜鐵砂低銅多至八九萬斤或十餘萬斤實屬不成事體著唐炯嚴飭該公司等嗣後不得再有低潮攪和情事並隨時稽查如有此等弊混卽著將該廠員等嚴參示懲原片著鈔給唐炯閱看將此諭知戶部並諭令唐炯知之○甲寅命慶音布管理嚮導處事務○子副都統恩全照例議卹

八月丁巳夕 月於西郊 上親詣行禮○命恩明稽查值年旗事務○戊午祭 社 稷壇 上親詣

行禮○己未 上幸頤和園詣 慈福端佑康頤昭豫莊誠壽恭欽獻皇太后前請安○還海○辛酉

上幸營前齋間侍衛射○諭軍機大臣等戶部奏籌撥甘肅新餉一摺甘肅關內外各庫餉銀關係緊要現經該撫嚴飭司道按照撥數於本年十二月底趕解三成至來年四月底再解三成其餘統限九月底解清○壬戌李鴻章奏總兵黃金志因病請開缺允之○以呼延霖爲山西大同鎮總兵○癸亥德馨奏臣前准軍機大臣字寄光緒十七年六月初六日奉 上諭各省哥老會匪最爲地方之害著各督撫嚴飭地方文武實力查緝如有訪報會匪首犯一面嚴行懲辦一面准將出力員弁照異常勞績隨案奏請優獎總期屢懲首逆解散裔從以除奸宄而安良善等因欽此當經欽遵督飭地方文武各員隨時實力查緝並將先後緝獲匪犯審明懲辦情形經臣酌入奏報在案茲據撫州府知府顏鍾璽稟稱本年二月間訪聞所屬崇仁縣地方有會匪賣票勾結煽惑情事即密派委員周文潮委并許昌廣並飭縣會營查拿據署崇仁縣知縣邢景彬將買票之鄒新春拿獲搜出旗票二張解府訊係向樂興保買受該府即密商撫州營都司韓定國飭派弁兵立將樂興保拿獲搜獲木質假印鐵劍一併解府查驗木印篆文模糊核與起獲鄒新春旗票上字跡相符提訊樂興保據供與已革生員陳常並許生發等賣票糾黨欲圖起事屬實隨即密飭邢景彬防範查拿一面移會都司韓定國將同署撫州營千總施得元外委袁以鉞王雄彪等各帶兵役星夜馳往會同該縣等將陳常許生發緝獲解訊供詞狡展請解省審辦即經臣此飭

提省嚴審並據該府續稟拿獲徐淪青卽淪俚黎先漢詹堂發卽堂俚等一併解省審辦當經批飭臬司
發委南昌府知府曹秉濬確審茲據該府提集各犯審明解由臬司覆審開錄招供摺解訊前來臣親提
研鞫據陳常供崇仁縣人光緒四年考入縣學文生平素包攬詞訟武斷鄉曲酗酒凶橫人多畏懼經學
及縣報劣詳革光緒八年間在蔣莊軒家飲酒醉睡醒蔣莊軒告知見伊妻身現金龍因此遂蓄志陰
謀不軌遂取別號立民卽以中天下而立定四海之民編立字號假誦母元君會爲名邀允已獲之許生
發並徐淪青卽淪俚黎先漢詹堂發卽堂俚在逃之許大棟王癩子黎加葆詹義龍程羊禾許盛法黎多
老詹靖和陳京祥入夥代爲糾人以忠義二字爲口號希圖相時而動借打教會匪爲名佔取壘灣現在
尙未動手致被訪聞拿獲等語訊據樂興保亦供崇仁縣人光緒元年間聽從樂正龍邀入哥老會計受
票據封爲總旗僞職能管一百餘人光緒五年間經縣訪聞查拿樂正龍脫逃伊被拿獲到案將票繳縣
由族房保出令伊改過自新今年正月伊復起意開山賣票仿照樂正龍哥老會旗票式樣造成旗票票
上橫寫漢家山兩旁寫三仙水名華香下面橫寫趙獻堂中填寫取左旗字樣旗旁寫統領九龍兼理定
軍鄉等字蓋用四方木印旁蓋吉星小印編有天地元黃四字捏造左右旗前後中哨名目旗票旋邀允
鄉新春買受旗票入會並誘張興隆等買受潛謀各處糾人約期起事等供不諱質之許生發等供被誘

竊從入會尙無爲匪情事餘供與陳常等大略相同臣查該匪首革生陳常平素兇橫武斷雄踞一方妄號立民以中天下而立定四海之民十字編爲糾人暗記假誦母元君會爲名意存藉端起事佔取臺灣又妄稱金龍現身久著異志招集亡命黨羽多名圖謀不軌雖事尙未行而悖逆昭著實爲匪首渠魁罪無可追該犯樂興保先會入司老會受封總旗低職被獲到案經家族保出並不改過自新今復開山竄票捏寫悖逆語同旗票誘人買受並輾轉邀人入會仍圖煽亂滋擾甘心從逆怙惡不悛實與陳常同惡相濟厥罪維均現當會匪到盛蔓延之際若不從嚴懲辦明正典刑不足以彰顯戮而杜亂萌臣於督同司道審明後卽恭請 王命將匪首革生陳常匪犯樂興保喻明正身綁赴市曹處斬將首級一併傳赴犯事地方懸竿示衆以昭炯戒其於聽糾入夥之許生發等及買票入會之鄭新春等情節稍輕仍飭該府按律議擬另行詳辦陳常先經學報劣詳革教官應免議處失察該犯等爲匪之牌甲及不能禁約之族兄飭縣傳案照例分別折責發落此案匪徒倡謀爲逆卽經該府縣訪聞會黨拿獲解省懲辦在事出力員弁自應欽遵 諭旨隨案奏獎以勵將來得 旨如所請行○工部尙書祁世長卒賜卹如例賞其保一品隨生師曾以員外郎卽補子友董由部帶領引見尋予諡文恪○乙丑 上詣 奉先殿 壽皇殿行禮○劉樹棠奏哥老會匪到處煽誘愚民散放票布希圖勾結滋事最爲地方隱患自年前江皖兩

省拿辦紛竄浙江湖州府所屬各縣地多毗連匪蹤忽因而隨處竄匿防不勝防上年六月間欽奉
寄諭飭拿嚴辦迭經撫臣崧駿嚴飭地方文武及駐紮防軍會同查拿臣履任後又經密飭拿辦各在案
嗣於本年五月十九日據署安吉縣知縣錢錫珪稟稱據開得志黃文祥以伊等悔過各欲繳布出會匪
首劉玉貴聞知將伊等捉去拷打來縣繳布呈首即密會營馳往掩捕該匪劉玉貴膽敢率眾抗拒經兵
役奮力兜拿登時擒獲匪犯劉玉貴即劉錫堂一名餘匪逃散等情當經臣飭委候補知府潘祖頤前往
督訊又據統領楚軍寅字等營旗候補知府楊鼎勳以據幫辦營務委員候補知縣蔣本鑑督飭弁勇會
同安吉長興各縣投緝拿會匪彭長勝一名起獲令旗票布多件並據烏程縣知縣張觀光以會公緝獲
會匪米國安一名各等情先後稟報又經臣飭解湖州府親提訊辦去後茲據潘祖頤以督同該縣錢錫
珪訊據劉玉貴供稱湖北廣濟縣人先會當勇革退前年會過聚議在逃之胡名揚說近有中華山哥老
會匪報國堂邀伊入會將來成事自有好處分給票布一張蓋有信印胡名揚又說會中另有暗號遇見
同會各相關照並以伊在營多年熟悉事情派充紅旗老五後升太雄山忠義堂金花營務處胡名揚又
與伊雕刻印信並各樣圖板印就票布多張各自隨處散放詐得洋錢陸續花用聞得志黃文祥所執票
布係伊散給後因孫憲堂不允出洋入會率眾搶得穀子賣錢分用又因聞得志等各欲繳布出會經伊

糾衆捉去坐堂拷打印信圖板票布俱已開拿鉅燭廟寶並據署湖州府知府張琳以訊據彭長勝供稱
湖南湘潭縣人先曾當勇革退前年會過素誠在逃之胡名揚說在江南省設立中華山報國堂哥老會
邀伊入會可圖富貴會內有坐陪行立四字分等胡名揚是坐堂老大伊在行字八排充當營務處後胡
名揚又獨開太雄山忠義堂會名令伊充當金花坐堂給執黃旗一面填寫雙金花管帶漢字號彭字樣
胡名揚又給伊黃紅綾令旗並白票布多件囑往各處散給經伊在南京及安徽廣德州等處散去票布
六十餘塊又旗十餘面每散旗一面收洋一圓票布一塊收錢六七百文不等所得錢洋隨時花用又訊
據米國安供稱湖南鳳凰縣人先曾在營當差遣散光緒十一年在安徽蕪湖地方會過在逃之四川人
王敬之說哥老會多少好處邀伊入會給執票布一張填寫文武山忠義堂禮堂米國安字樣會內立有
暗號十三年間伊在甯國地方鬧事聞拿逃避將會內票布焚燬後伊與正法之王福亭等至青陽縣鄉
村搶劫又與同會之彭裕成將余姓捉至廣德與安吉交界地方殺死屬寶先後具稟前來臣查該匪劉
玉貴彭長勝以游勇聽糾入會各受僞職轉放旗布希圖潛謀不軌劉玉貴尤敢坐堂拷賈逆跡昭然均
未便稍稽顧竊已查照嚴辦會匪章程批飭將該二犯一併正法梟首示衆以昭炯戒該匪米國安以游
勇入會滋事法亦不容稍寬惟現准安徽撫臣以廣德州轉有會匪審訊未定供出該犯姓名待質已批

飭解歸皖省審辦開得志黃文祥悔罪繖布自首且據指出匪首姓名因而拿獲情有可原議遵 諭旨宥其既往准予自新起獲旗布一律銷燬此外地方良民有被誘被脅並非甘心入會者現已仰體 皇仁示期繳布免罪並以湖州府屬土客雜處匪易混跡嚴飭各縣認真編查保甲以清奸宄而絕匪源至該匪劉玉貴等分途立會結黨隱謀不軌捕拿稍遲必致蔓延貽害在事各員或嚴密購捕或奮勇撲拿均能不遺餘力得以次第擒消弭患洵屬有勞足錄可否容 臣查明出力員弁擇尤酌保以示鼓勵之處出自 恩施得 旨著准其酌保數員勿計冒濫○辛未 上幸頤和園詣 慈福端佑康頤昭豫莊誠壽恭欽獻崇熙皇太后前請安○還海○福潤奏奴才前將秋汛水勢盛漲惠民等縣堤埝漫溢請將在工員弁分別參懲並自請議處緣山於七月初八日奏報在案旋閱邸鈔欽奉 上諭飭將各處口門盤築裹頭免致續塌一俟水勢稍平趕緊堵合上下游完督各工並令竭力防護毋得再有疏虞等因欽此仰見 聖主慎重要工之至意查黃河水勢於七月初十日以後漸止天晴始行停漲十七日節交白露遂漸消退上下游完督各工均保平穩各處漫口亦經總辦道員張上達李希杰等將裹頭盤築穩固連日督同勘估籌辦翼口門早堵一日民生即早安一日該員等亦知工關緊要力圖補救已將利津縣張家屋漫口一處搶堵合龍其餘工程以胡家岸為最鉅口門刷寬一百七十餘丈水深丈餘及二丈餘不

等堵築較爲費力桑家渡及瀋陽關灰礮已茅墳三處情形次之現已飭購棉繩料各物尅期興工派張上達堵築胡家岸之口該管段內尙有章邱縣華莊民埕被水衝塌亦令如式堵修至桑家渡等三處均爲下游段落應歸李希杰堵辦誠恐兼顧難周添派補用知府多培分堵灰礮工程以期迅速竣事所需經費不敷擬在於濟庫移緩就急籌撥銀十萬兩糧道庫濟倉項下籌撥銀五萬兩臨清關徵存稅銀項下籌撥銀三萬五千兩暫資應用工次需用人夫卽招集災民以工代賑將賑銀均勻接濟奴才現駐工次往來督催務於迅速之中並臻鞏固以期上紓 廣念下衛民生下部知之○壬申以孫家鼐爲工部尙書徐卨爲都察院左都御史○轉徐用儀爲吏部左侍郎調廖壽豐爲吏部右侍郎轉張蔭桓爲戶部左侍郎兼管三庫事務以陳學棻爲戶部右侍郎兼管錢法堂事務○調肅秀爲盛京兵部侍郎以長麟爲禮部左侍郎○癸酉命孫家鼐兼管順天府府尹事務○丙子以薛福成爲都察院左副都御史○賞給普濟堂功德林廣仁堂及蘆溝橋粥廠資習堂煖廠米石○戊寅 上詣 壽皇殿行禮○己卯諭給事中洪良品奏本年朝審絞犯永氏一案疑竇甚多請派大臣提審一摺著派翁同龢懷塔布提集人證加覆訊妥議具奏○洪良品奏永定河爲京畿襟帶水性湍急擁泥挾沙易潰難治其北岸頭工上汛屆永定之上游距 南苑十餘里距右安門彰儀門皆足三十里堤岸之安危關係尤重是河工莫要

於永定而籌治永定莫如於北岸上汛矣自康熙三十七年提築沙堤尙不足資抵禦屢被衝決又復潰溢決口衝刷南苑牆垣右安門彰儀門皆被水浸公文摺報爲之阻隔故臣前陳水利疏摺首以爲言今年河堤又報潰決雖未衝及城垣勢亦岌岌苟不亟籌一勞永逸之計縹緲未雨將頻年潰決不獨民生罹沉溺之害卽皇居亦有震蕩之虞臣查永定河發源山西朔州會塞外諸水由石景山奔騰下駛至蘆溝橋爲之一束出碕愈形澎湃而北岸上汛適當其衝欲以一縷沙堤抵禦萬山會注之狂流知防守之策勢有窮於人力者竊考石景山北岸舊原有石堤二十四里自北金溝起至蘆溝橋通下四里止肇自金元我朝因之屢加修葺其爲堅固足以抵禦盛漲屢與土人談及北上汛地勢與蘆溝橋上下相同河底皆係石子根基結實墩樁未能深入埽工易於漂蕩非比下游河底純沙淘刷深根石堤處有傾圮倘接連石景山二十四號自北上汛頭號起至十號止添砌石堤十里庶水勢有所抵禦足以捍衛京師俟北岸辦有成效然後再及下游續籌疏濬之方水患自然輕減茲特先其所急約計十里石堤工需不過十數萬金查嘉慶二十四年北上七八九號漫口報銷二十六萬兩聞前年北上二號漫口亦撥發銀三十萬兩今雖經費雖籌然權衡輕重每次河決勞費國家之調賑淹沒閭閻之田廬所耗不可以億計其利害得失固皎然可知矣但河工雖爲直督專責臣查道光以前河務事宜朝廷每專派大

員辦理夏以河形水勢非親身履勘籌畫必不能周李鴻章身任封疆洋務海防甘不暇給責以治河其勢實難兼顧可否仰乞 聖裁 特擬一熟諳河務大員會同李鴻章共商勘辦庶幾於事有濟 上諭軍機大臣等給事中洪良品奏永定河水性湍急每易潰決其北岸頭工上汛關繫尤重請接連石景山二十四號自北上汛頭號起至十號止添砌石堤十里以資捍衛等語著李鴻章遵派熟悉河工之員前往該處詳細履勘妥籌具奏○壬午前長江水師提督李成謀卒賜卹如例戰績交國史館立傳原籍及立功省分建祠賞其子江蘇候補同知傅新以知府用尋予諡勇愬○甲申諭福潤奏災區需賑孔殷請截留新漕以資散放一摺本年山東黃河秋汛期內水勢盛漲加以雨水山東同時匯注河身不能容納衝達兩河同時漫溢所有惠民等州縣沿河村莊被淹扶危災民困苦情形深堪憫念自應寬籌賑撫著照所請將該省本年新漕除照向例撥兌各處散放外其餘應行運進糧石悉數截留並將隨漕輕解等項按數扣交以備賑需該撫卽飭所屬分別被災輕重核實散放務使實惠及民毋任吏胥稍有弊混用副朝廷軫念災區至意○以福錕爲大學士吏部尙書麟書協辦大學士○調熙敬爲戶部尙書以松桂爲工部尙書○轉敬信爲吏部左侍郎調崇光爲吏部右侍郎以志願爲工部右侍郎○命張之萬管理吏部事務○是月英吉利國使臣華爾身調駐羅馬尼亞國由參贊代理使事

九月丙戌朔祭 歷代帝王廟遣臧勛行禮○丁亥諭軍機大臣等有人奏去冬廣東省城匪徒白晝夥

搶連劫舖戶今年西關等處有鎗斃練勇刃傷婦女情事官輪緝私被賊誘奪船隻兵弁受傷揭陽縣衙署被火案卷焚燬海關苛罰商販巡勇斃斃土人衆情忿怨罷市六日連平州牧不協輿情致激民變此等重案皆未參辦請飭澈查等語所奏如果屬實殊屬不成事體著李瀚章剛毅按照所參各節確切查明據實密奏毋得稍有隱飾原片著鈔給閱看將此諭令知之○戊子張煦奏於光緒十八年七月間風聞江西萍鄉縣與湖南長沙府屬之醴陵縣交界地方有匪徒聚集正飭查聞旋據醴陵縣知縣沈繼欽稟報七月十三日初更時分有萍鄉縣會匪二三百人乘間闖入頭紫白巾突至縣署撞破監門將承遠監禁會匪鄧雪標羅興廷劫去命案犯李冬元並未定罪罪名案人犯易子倫盜犯吳尚錦劉美林劉秀發五名亦乘變逃逸派管監禁丁役均被拒傷並連劫裕順長錢店福生和雜貨店該縣隨即會同駐防振字營管帶總兵余福章城守營把總毛宗發帶領兵丁勇役圍拿該縣向無城垣街衢四達堵截不及匪徒遂向萍鄉大路奔逃迨至八里窪地面匪衆轉而拒捕致傷勇丁文國寶等五名余福章督勇奮擊格斃匪黨三名拿獲黃恩李佐全鄧光前李初揚金惟賢蕭會祥劉全元晏全瑞鄧均德劉桂連等十名奪獲兵械多件餘匪悉數逃入萍鄉界係隔省未便越境搜捕訊據拿獲之匪犯黃恩等均各供認

入會爲匪劫奪監犯鋪戶等情不諱沈繼燦因匪徒甫經遁回尙未解散訛言四起民情驚惶恐致復有疏虞當將黃恩等十名均就地正法以安人心並探聞匪黨聚集甚多潛謀報復等情具稟到省當即添派振字前營副將顧武林帶勇一哨參將譚尙貴等帶親軍營勇一哨千總周吉泰等帶練軍一百名先後馳赴該縣協同防緝又恐該縣所稟尙有不實難保不另有起釁別情飭司道委候補道劉鈺前往確查實在情形去後旋據劉鈺查明醴陵南鄉與江西萍鄉接壤萍鄉縣屬有地名泰安里萬山墳繞向爲通逃淵藪匪徒蓄萃設立天全山合義堂等名目有李石珊賴榜即劉黃全鄧海山等均係頭目鄧雲輝羅翼廷經醴陵縣拿獲訊明照奏定章程永遠監禁該匪等蓄意劫奪是日潛匿醴陵附近地方初更時頭紮白巾闖入縣署劫得羅翼廷等蜂擁而去監犯李冬元等卽乘間逸出尙有在監已入秋審絞犯周汝文甫經拿獲尙未解勘之命案人犯王瑞珍等守法未動訊據該犯等敢稱匪衆進監卽呼聲震耀羅翼廷不及毀去刑具忽忽扛擡而去查驗禁卒湯盛唐盛陳奇該縣家丁王古典史丁烈榮暨振字營勇丁文國賓余得陽王彪炳左輝廷陸居近各受有刀棍傷痕屬實俗盛長錢店卽在署前致被劫去銀錢煙土福生和雜貨店接近南門爲匪衆必由之路致被劫去布疋錢文維時甫及初更門皆虛掩故門壁均無損壞痕跡等情稟復續據探報該匪等尙在萍鄉縣之泰安里杞木等處盤踞江西省派有吉

字營勇在彼查拿等語據該管道府揭報由司會詳前來臣查哥老會匪久爲地方之害行蹤詭秘聚散靡常欽奉 特旨隨時查緝雖經拿獲首要從嚴懲辦緝未淨絕根株此次刻出之鄂雲輝羅翼廷均因總糾入會領有票布經該前縣拿獲審明係甘心爲匪尙無坐堂等名號照奏定章程稟准永遠監禁隨陵縣向無城垣沈繼燦以部選人員甫經到任於地方情形未能熟悉猝不及防致被匪徒闖入縣署劫去重囚雖登時追捕格殺悍匪三名並拿獲十名訊明懲辦而事前疏於防範咎實難辭除將該縣撤任勒限兩月留於地方協緝另行委員前往代理一面飛調統帶振字全軍前陝西陝安鎮總兵余虎恩馳往督辦並咨江西巡撫臣加派勇營前來約期不分畛域會合掩捕外相應請 旨將醴陵縣知縣沈繼燦典史鄧鴻藻先交部議處俟限滿有無弋獲再行分別辦理得 旨沈繼燦鄧鴻藻均著先行交部議處餘依議○庚寅諭本年江蘇鎮江府屬因亢晴日久田禾未能及時栽插丹徒丹陽二縣被旱尤重荒歉情形殊堪憫惻瞬交冬令小民衣食無資亟宜預籌賑濟加恩賞給江北河運清米五萬石所有水腳經費等款一併截留爲鎮屬各災區賑濟之用卽著劉坤一奎俊督同司道勘明被災區所屬飭印委各員確查戶口核實散放並將賑撫事宜查照成案妥籌辦理總期實惠及民毋得稍有弊混用副朝廷軫念災區至意○裕寬奏豫省本年伏秋之交雨水太多爲近年所未有或傾盆竟日或淋漓連朝苗錦

灘迭報長水一日之中二三五尺不等黃河來源既旺益以大雨時行匯合衆流建瓴而下掀波駭浪拍岸拉堤自武陟縣官工尾以上大溜北滾武陟之攔黃埧適當頂衝水勢洶湧異常喫重幸上年因該處壩埧裂經奴才奏明籌款修築工程堅實又經設法防護幸未撼動惟前次請款無多僅能擇要拋築河流變遷不測今歲無工處所奇險環生本未籌有歲修而來勢緊迫設若稍有疏虞不但河朔三郡懼罹水患所耗實多且恐波及直東兩境尤於大局有礙是以未敢拘泥延誤奴才與河臣許振祿彼此籌商令委熟悉河務各員馳往察看情形一面挪借款項撒手搶辦並添築順河壩一道又幫堤後戩一道始得保護平穩所費亦屬不貲此外如滑縣之老安堤孟縣之小金堤均據稟報迭被衝擊屢有墊陷復經奴才札飭各該地方官墊款購料竭力搶護亦皆幸保無虞現在節逾秋分雖距霜降不遠大致已獲穩定而河水長落靡常秋汛尙未已洶刷搜根水力愈動日用兢兢縱令不再生險而各該處仍須趕緊運石購料方能有備無患卽來歲春汛修守亦須豫爲籌備蓋從前自攔黃埧以上凡有堤埧悉屬民工其費並不臨河故皆無工與下游七屬有工處所原屬不同近年上游河勢北趨自小金堤至攔黃埧地段綿長節節生險民力既難肩任不得不由官經理河身雖有上下游之分而應鑲築修守等情事實無二致現在籌補墊款及預購石料計非四萬餘兩不能敷用合無仰懇 天恩准將糧道庫存光緒十

五年裁存幫丁月糧銀四萬兩全數截留以便飭令多購石料預爲布置免致臨時周章得 旨如所請

行○壬辰 上幸頤和園詣 慈禧端佑康頤昭豫莊誠壽恭欽獻皇太后前請安○還海○張之洞譚

繼洵奏峽江之險甲於天下上自四川夔巫交界之涪石起下至湖北東湖之虎牙灘止計水程四百餘里險灘五十餘處行旅船隻往來動輒失事夏秋尤甚復漲之患無日無之其情狀慘不忍言光緒二年
前四川督臣丁寶楨在山東巡撫任內捐集銀四千兩附寄到鄂經前兼署督臣翁同龢札委總兵羅增
紳等釘造大小救生紅船十五隻連舊有培元堂等處紅船四隻擺江二隻共計船二十一隻光緒八年
前湖南提督鮑超奏奉 諭旨著湖廣總督湖北巡撫籌撥款項於著名險灘處所酌量添設紅船並飭
屬隨時認真救護以保行旅等因欽此又經前督臣涂宗瀛前撫臣彭祖賢奏明添設救生紅船六隻光
緒二十四等年前任浙江按察使黃毓恩先後捐設二隻統計現設紅船二十九隻分泊各灘均屬宜
昌鎮總兵羅增紳督率救護所需舵工水手工食修驗經費除黃毓恩所捐二隻培元堂得有二隻有存
欸備用外其餘二十五隻均在宜昌川鹽局五成充餉公費項下就近撥給歷年以來全活人口甚眾頗
著成效惟險灘過多紅船尚少行旅往來仍多企望茲據湖北宜昌鎮總兵羅增紳稟稱查峽江著名險
灘全在湖北境內江中亂石縱橫地段甚長相隔十餘里或五六里必有一險要之灘有水漲而險者亦

有水枯而險者情形時有變遷一遇覆舟求救近則可以立時往援遠則時慮艱長莫及宜昌爲川楚通衢川鹽商人均在該處聚集自設立通商口岸以來華洋雜處益形繁盛近來重慶開設新關商賈行旅更倍從前其滇黔兩省運解銅鉛軍械委員亦皆由峽江行駛尤關緊要凡此往來之官商莫不倚紅船爲保護每至身當危難而卒獲安全者實賴紅船救援之力居多惟官商船隻大者百餘人小者亦數十人設遇風潮延頸待救紅船僅可容載數人多則有擁擠沉淪之患大約每日仍必有覆溺之船情形甚慘若次第接救覆舟危在呼吸迫不及待往往難獲生全體察情形原設紅船實屬不敷分布擬請再行添遣紅船十五隻並添造船板三號以資彈壓梭巡督飭認真撈救等情臣等批飭湖北藩臬兩司鹽法道會同督後川鹽各局妥議詳辦當據該司道詳覆以該鎮籌議各節均實在情形應請照擬添設各船統歸該鎮緝緝紳管理督率救援以保行旅且商船鹽船連櫓而下每途夏令盛漲往往停泊不行今添設紅船十五號連原有三船共四十四號分泊梭巡又得船板往來稽查彈壓商人恃以無恐尙可通行無阻於抽收鹽貨釐稅等項均有裨益已於六月趕造工竣查驗船身一律統計添設紅船十五號船板三號每年經費共需銀四千四百餘兩三年大修一次經費銀約五百餘兩照案仍請在於宜昌川鹽局五成充餉公費項下開支均歸善後局造冊報銷所費無多於正項餉需並無妨礙而峽江行旅受惠無

窮等情並詳請奏前來臣等查峽江之險上虞 宸衷前經欽奉 諭旨於著名險灘處所飭令酌量添設紅船隨時認真救護以保行旅 仁施廣被感頌同聲現經臣等體察情形險灘過多行旅日盛原設紅船實屬不敷拯救督飭該司道等籌捐添設歲需經費援案開支於正項餉需並不相妨而行旅安全羣欣利涉洵足以保民命而廣 皇仁得 旨如所請行○癸巳予河工人員明保等獎敘○甲午以張之萬爲東閣大學士福錕爲體仁閣大學士○李鴻章等奏內閣鈔出福建學政沈源深等奏請宋儒游酢從祀 文廟一摺光緒十七年十月二十三日奉 硃批禮部議奏欽此欽遵到部臣等查咸豐十年閏三月大學士軍機大臣遵 旨議定嗣後從祀 文廟應以闡明聖學傳授道統爲斷除著書立說羽翼經傳眞能躬行實踐者准各該督撫臚列事實奏請從祀外其餘概不得濫請又同治二年六月臣部覆奏准請 飭下各直省督撫學政恪遵咸豐十年奏准定章不得援案率行陳請如爲 文廟中必應從祀之先賢先儒方准該督撫會同學政詳加攷核奏明請 旨並將 欽定書籍中引用若干條論贊若干條先儒書籍中引用若干條論贊若干條一併詳細造冊送部由禮部會同大學士九卿國子監嚴密等因在案茲據原奏內稱宋儒游酢字定夫建州建陽人少有志聖賢游學至京師程頤一見謂其資可與進道言於兄顯酢與將樂楊時執弟子禮見顯於頤昌遺棄所學而學焉徽宗召爲監察御史屢疏

陳青厯守四郡時百姓方困徵斂而朝廷市材調夫無虛月所在矜然酢處之裕如民不煩而事集去則思之不忘學者稱爲薦山先生楊時誌其墓曰予受業明道先生之門有友二人焉謝良佐顯道公其一也公得邑河清余往見之伊川謂余曰游君德器粹然學問日進政事亦絕人遠蓋師門見稱如此則所造可知矣朱子書云游公清德重望皎如日星其流風餘韻足以師世範俗又云定夫事業未得大施獨有中庸語孟說垂於世又云程子於游酢稱其穎悟溫厚謂楊不及游 御批歷代通鑑輯覽紀程頤門人稱游酢爲成德之尤所著有中庸義易說詩二南義論語孟子雜解各一卷文集十卷今多遺缺查程門高弟游楊並稱頤最愛時頤最愛酢又游酢與謝良佐楊時呂大臨號程門四先生朱子於酢所著述嘗採入四書集註該紳士等以楊氏以下諸儒多從祀 廟庭游氏獨闕故呈請具奏擬請 飭部核議等語並將游酢遺書十卷咨送前來 臣等攷宋史道學傳稱酢與兄頤以文行知名所交皆天下士程頤見之京師謂其實可與進道程頤興扶溝學招使肄業靈臺所學而學爲第進士調蕭山尉近臣薦其賢召爲大學錄選博士以奉親不便求知河陽縣范純仁守頤昌辟府教授純仁入相復爲博士簽書齊州京州判官晚得監察御史歷知漢陽軍和舒濠三州而卒又攷 欽定四庫全書總目載游薦山集四卷首以論語雜解中庸義孟子雜解爲一卷次易說詩二南義爲一卷次師語師訓爲一卷次文七篇詩十

三首附以墓誌年譜爲一卷又有拾遺孟子雜解八條詩二南義二條又攷御纂性理精義御纂周易折中欽定詩經傳說彙纂於游酢所著易說詩二南義師語師訓等書頗多采錄又攷御纂朱子全書內有論贊游酢德性甚好語又朱子大全文集載所撰游御史祠記全引楊時所撰游酢墓誌以爲知先生之深而言足以表其德且信於後宜莫踰於楊公者先生之道學德性於此可以觀其詳矣等語亦無異詞又朱子遺書伊洛淵源錄游酢遺事五條第一條卽引二程全書內程頤稱游酢資質溫厚楊時雖不逮酢然然頤悟之語至朱子四書集註頒行學校所錄游酢說最多學者人人誦習尤其顯而易見者此外先儒諸書如宋李士英道學名臣言行錄明朱衡道南源委國朝孫奇逢理學宗傳黃宗羲宋儒山學案所構引論列游酢之處大略相同臣等綜摺載籍悉心核議竊以道德學問三代以上當折衷於孔孟三代以下當折衷於程朱今游酢有程頤程顥爲之師有楊時謝良佐輩爲之友有朱子採其著錄述其遺事筆之於書況遺際我朝列聖御纂欽定諸經籍著錄其說尤可據爲千秋定論是其人足以闡明聖學羽翼經傳固已無愧至其生平出處裕之史傳亦無可訾尤爲躬行實踐非空言著作家可比且考御批歷代通鑑輯覽載宋理宗嘉熙二年燕京建太極書院及周子祠以二程張楊游朱六子配食由是河朔始知道學是游酢在當時已與程朱諸賢爲人心所共推重又程門中楊時謝

良佐尹燁諸人皆久已從祀 文廟游酢道德學問亦無慚於數子等公同商酌擬如該學政沈源深等所請以游酢從祀 文廟其位次應在西廡楊時之次 上諭內閣禮部等衙門嚴復福建學政沈源深奏請以宋儒游酢從祀 文廟一摺宋儒游酢清德望重在當時已與程朱諸賢爲人心所共推重所著論語雜解中庸義孟子雜解易說詩二南義等書足以闡明聖學羽翼經傳其生平出處史傳昭垂允爲躬行實踐宜膺茂典俾列宮牆游酢著從祀 文廟位在西廡楊時之次以崇實學而闡幽光○乙未長順奏西寧辦事大臣薩凌阿因病開缺允之○以奎順爲西寧辦事大臣○丙申賞給京師朔陽關臥佛寺育嬰堂打磨廠長椿寺磚塔胡同圓通觀梁家園各粥廠米石○賞給崇善堂自善堂公善堂各燬廠及禮拜寺南海會寺玉清觀三忠祠西悅生堂各粥廠米石○丁酉諭前據楊昌濬奏已故陝西河州鎮總兵沈玉遂戰功卓著懇懇優卹當經降旨議卹並准其立傳建祠茲據都察院左副都御史楊頤奏同治二年粵逆餘黨陳金剛等就誅未聞湘軍前來助戰高州郡城亦未失陷楊昌濬原奏沈玉遂率五千人馳往克高州與當時情事不符請飭更正等語沈玉遂轉戰各省勞績自不可泯惟於剿平陳金剛股匪該故員既未身與其事卽著國史館將沈玉遂本傳核明更正以昭詳慎楊昌濬未能詳查確實率行具奏殊屬疏忽著交部察議嗣後各該督撫於奏請賜卹之案務須查明實在戰功事蹟不得僅憑

商部呈報卽行臚陳入告致涉虛誣用副朝廷錄善勳功綜核名實之至意○戊戌以壽陵爲內閣學士
○己亥諭希元譚鍾麟奏捕獲匪首審明正法出力員弁開單請獎一摺福建德化縣土匪陳拱等上年
八月間聚衆滋事經希元等飭令提督孫開華督軍剿辦匪首次第擒擒地方悉臻安謐所保在事出力
員弁著該部議奏餘著照所議辦理單併發另片奏已革副將余宏亮捕獲匪首出力才具尙堪任使可
否乘璫錄用等語余宏亮著加恩以參將錄用○李鴻章奏朝鮮庫藏空虛自通商以來洋人乘隙誘以
借債之說傳以關稅作抵意欲暗持該國利權若果聽其辦成隱患甚大光緒十六年閏二月間臣與總
理各國事務衙門會奏遵議要件摺內第五條聲明此等舉動一有萌芽卽應設法阻止如實係軍國要
需應由中國代借以保利權而杜流弊等因在案是年朝鮮遣託洋員向英美日本各國貸款均由總理
衙門及臣分電各出使大臣設法阻止但朝鮮實係貧窘徒事東緝不爲代籌恐致其心愈離亦非聖
朝字小之義本年四月間辦理朝鮮商務委員存記簡放海關道袁世凱假滿赴韓經過天津臣密授機
宜面諭隨時相機妥辦嗣據該道以朝鮮前因購買輪船恩借德商洋債未能清償利息日增索速日急
計欠至十萬之數由該國外署督辦閱種默函請向華商告貸在韓華商資本無多難集鉅款請在出使
經費項下撥借銀十萬兩由股實商家出名訂立合同由朝鮮海關按期拔還恩亦以次遞減電請核商

前來當經電商總理衙門覆准照辦并以利息宜從輕年限宜從速屬飭妥議稟辦即經轉電該道遵照
茲據稟稱商准借銀十萬兩月息六釐限八十箇月按月分償完結由派往朝鮮稅務司與華商同順泰
號出名擬具合同底稿送呈朝鮮國王核定因所欠德債係轉運漕米輪船價值訂明由轉運總務官出
名與同順泰訂立合同該道復將所擬底稿略加刪改列具七款聲明該總務官係奉該國政府之命議
登續就合同兩本約同該總務官鄭某夏同順泰商人譚以時當面畫押分用印章該道與外署督辦閱
種默同時監訂各加印押其合同一本附卷一本交閩種默在外署備查照續底稿呈請奏咨等情臣查
朝鮮借款若免其生息恐歸還必多遲延而官款取息於體統又未甚合該道擬於出使經費項下撥借
由華商出名僅令認息六釐較洋債倍爲輕減且山海關拔還則操縱尤可在握陽示羈縻賄資鈐制辦
法尙爲妥洽保護屬藩大局殊有裨益臣與總理衙門往返電商意見相同除由總理衙門飭令江海關
道撥借出使經費銀十萬兩交同順泰號轉付仍由臣督飭商務委員袁世凱按期認真催交勿任延欠
得旨如所請行○癸卯賞給通州王恕園等處粥廠賑米一千石○駐藏辦事大臣升泰卒賜卹如
例賞其子壽春以主事用○甲辰以奎燾爲駐藏辦事大臣延茂爲駐藏幫辦大臣○以王文韶爲內閣
學士○諭沙克都林扎布奏遵保哈巴河安提蒙哈出力人員請旨獎勵各摺片著該部議奏○乙巳德

器奏臣前因湖南醴陵臨湘等縣會匪嘯聚劫獄謀逆江西萍鄉等縣壤地相接調派吉字剛字等營馳往防剿並添募營勇籌辦團防各情形業經附片具奏在案萍鄉地方與袁州府屬之宜春分宜萬載及瑞州吉安府屬各屬縣犬牙相錯處處毗連湖南醴陵江西萍鄉交界處有名武功山者地勢險峻環延百里統名爲泰安里該匪據爲巢穴偏惑附近各鄉靡然成風痞濫游民歸之如壑於七月二十八日豎旗起事先赴萍鄉屬蘆溪市地方搶掠團防軍械軍火並出安民僞示有謀逆袁州萍鄉各城之意民心惶恐紛紛逃避各屬中告急之稟接踵而來臣深以爲慮先調吉字剛字兩營雖已電授機宜不足剿辦卽經添派駐省之振武後營營官劉福松帶領營弁勇馳赴袁州會同相機進剿又慮萬載縣爲萍鄉緊鄰匪蹤飄忽勢必擾及後調駐省親兵營勇一哨派幫帶曹文元哨官許昌廣等馳赴萬載防守而長安瑞州郡城重地必須駐營策應俾助袁州聲勢又令江軍水師統領譚文秀督帶礮船二十號前赴長安府駐紮並選水勇百名配齊軍械合舟登陸派水勇師右營營官李茂乾帶赴蓮花屬防守又令內河水師統領李榮升派撥礮船十號駐紮瑞州河下以作該府屬等縣聲援恐江西防勇無多時電商督臣允撥二營撥備調用以爲後路接應此臣因匪勢猖獗酌調水陸各營布置防禦之情形也正據各營稟報到防並約會湖南防營兩省會攻於八月初十日據吉字營營官楊樂賓申報本月初二日夜探聞有

大股會匪約二千餘人整隊疾趨有圍攻縣城之意當即會同袁州營汛並督飭鄉團於四更時潛馳迎擊行至距萍鄉縣城三十里之南坑地方正與匪遇列隊迎敵即行接仗該處山路險峻行進維艱始用鎗礮繼用短兵血戰逾時之久該匪始漸敗退我軍乘勢奮力分路追剿計共斃匪五十六名生擒三名傷傷無數奪獲鎗械旗幟多件營勇受傷十餘人次日並據團勇報稱山湖左近倒斃受傷匪屍三百餘具此一役也共計斃匪四百餘名匪勢浩大兇勇習戰實非尋常可比又據萍鄉縣知縣顧家相稟報探聞十二日又有匪徒由山徑竄至北門外四十里地方當經會營督團擊散匪衆立將偽楚氏一王即僞平南王鄧海山圍擊擒獲又據袁州府知府賈存珍督同宜春縣知縣楊焜稟拿獲大頭目李保山審明供認不諱均經臣批飭該府縣妥速解省訊明嚴辦以彰天討而快人心此外袁州宜春等府縣稟報團防鄉勇斬獲匪首匪黨亦復不少應俟稟報到齊另行彙核辦理此萍鄉縣南坑地方與匪接仗獲勝並擒斬匪首之實在情形也臣復查會匪隱患已深曾經臣奏請認真拿辦上年六月間並欽奉諭旨各省哥老會匪最爲地方之害飭令督率地方文武實力查緝嚴行懲辦經各省迭次訪報明正典刑而該匪黨羽甚繁究未大加懲創現查武功山泰安里匪巢由萍鄉之山口巖而入外隄內平跨延兩省數縣山口巖路並經該匪挖溝設伏僅存仄徑有一夫當關萬夫莫開之勢此次雖接仗獲勝擒斬多名而

匪情叵測盤踞堪虞將來帶固根深誠恐養癰成患自應飭令各營入山上緊收剿掃除淨盡以絕後患
除由臣嚴飭各營分路迅速搜捕仍令解散脅從剿撫並用及一切詳細情形統俟稟報到齊彙核奏報
外其在事出力員弁及團防紳董應俟一律肅清後容臣確查擇尤保獎得 旨知道了著卽嚴飭各營
迅速搜捕剿撫並用餘依議○戊申以克門太爲內閣學士○轉黃卓元爲翰林院侍讀學士以蔡澍春
爲翰林院侍講學士○諭前據光裕等奏參防禦文鐸私造假銀恃符狡展請旨革職當經降旨將文鐸
革職訊辦茲據步軍統領衙門奏該革員遣抱李旺以馬蘭鎮總兵英廉誣賈索賄等詞赴該衙門呈訴
案關屬員控告該管上司盧寶均應澈究著刑部提集案證秉公研訊確情定擬具奏○辛亥諭李鴻章
奏永定河決口大工合龍一摺本年六月間永定河南上壩灰壩漫溢成口經李鴻章卽派道員桂本誠
張運芬督同員弁挑挖引河築壩進占勒限趕辦於本月十八日合龍全河就歸故道辦理尙爲妥速在
事出力各員自應分別給獎除桂本誠另交軍機處存記外候補道張運芬著賞給二品銜並隨帶加三
級知府劉盛鑑著以道員留省補用道員用石景山同知寶廷鑾著開復摘頂處分並開去同知本缺仍
以道員留省補用在任候升知府永定河北岸同知孫錦祥著以道員在任候升補用知府北河候補同
知唐應駒著俟補缺後以道員用並賞戴花翎知府銜北岸通判署南岸同知蔣廷皋南岸同知署北岸

通判陳汝勵均著賞戴花翎候補都司北岸協守備李明德著加三品銜在任候補知縣甯州州判唐煦著開去摘頂處分並開去本缺以知縣留於直隸補用革職府經歷銜前涑水縣典史裴德潤著開復原官原銜免繳捐復銀兩仍歸原班補用永定河道萬培因前署南岸同知畋人傑甯州州同周榮第均著開復革職留任處分署北岸同知周起游良鄉縣縣丞韓傳琦均著開復摘頂處分周起游並著開復降二級留任處分餘著照所請辦理○壬子以傳廷臣爲湖北宜昌鎮總兵○癸丑前閩浙總督卞寶第卒賜卹如例○是月比利時國使臣陸彌爾回國參贊米師麗署理